

四庫全書

史部

欽定四庫全書

福建通志卷六十四

外島

周禮司寇氏有象胥以掌蠻夷戎貉之國五服之外梯航山海納賁獻琛九譯所及絡繹王會王者享其贄即臣其人匪曰羈縻勿絕已也海外東南夷朝貢京師道由閩粵宋置市舶司於泉州元吳鑒爲泉州守僉王立修清源續志有大食賓達儂五

十餘國然皆屬毳泉刀侵凌致數荷蘭日本叛服
跳梁滋爲閩患

本朝定鼎後琉球首先恭順朝貢封襲如明故制百
十年來漸漬文教頗有華風我

皇上加惠遠藩

廷見使臣慰其勞苦

賜予稠疊屢寬貢期蓋

國家柔遠之典與遠人內款之誠皆不可以無紀也

近蘇祿遐島久阻聲教遠涉波濤來修歲事爰是
條其國牒詳其往返常儀以爲斯紀他日化行日
出道震無雷入贄稱藩稽顙萬國顧庭實而咨外
史氏將大書特書不一書已也志外島

琉球國 在大海中始名流虬其國地形在萬濤中如
虬浮水面故名一作流求元史曰瑠求明永樂中
改琉球國在福州正東一千七百里偏南三里其
地東西狹寬處數十里南北長四百四十里有三

十六島水程南北三千里東西六百里漢魏以前
未通中國至隋大業中遣羽騎尉朱寬訪求異俗
語言不通掠一人而還後遣武賁郎將陳稜率兵
至其國擄男女五千人還唐宋時未嘗朝貢中國
中山世鑑云琉球始祖爲天孫氏初有一男一女
生於大荒自成夫婦曰阿摩美久生三男二女長
男天孫氏爲國主始二男爲諸侯始三男爲百姓
始長女曰君君二女曰祝祝一爲國之天神一爲

海神天孫氏傳二十五代荒遠不可考宋孝宗淳

熙十四年逆臣利勇恃寵擅權配其君而自立浦

添按司舜天討戮之衆推舜天爲王元時累遣使

招諭不從自舜天八傳

舜馬順熙義本英祖大成英慈玉成西威

至察

度元至正十年即位明洪武五年遣行人楊載齎

詔至其國察度遣弟泰期奉表稱臣入貢方物是

爲琉球通中國之始

所貢方物馬刀金銀酒海金銀粉匣瑪瑙象牙螺殼海巴

檳子扇泥金扇生紅銅錫生熟夏布牛皮降香木香速香檀香寅熟香烏木蘇木胡椒硫磺磨刀石

先是元延祐中琉球分國爲三曰中山曰山南曰

山北

分爲三省中山爲中頭省屬府十六山南爲島窟省屬府十二山北爲國頭省屬府九府

名間切所屬皆稱村頭國中亦有五嶽辨嶽在山八頭嶽在山南佳楚嶽名護嶽恩納嶽在山北

屢出兵相爭奪十五年賜詔諭之而山南王承宗

山北王怕尼芝亦相繼遣使入貢先後賞賜各有

等差洪武二十五年始遣王子洎陪臣子弟入太

學是爲琉球入監讀書之始自察度三傳

武寧思紹

至

尚巴志永樂二十年嗣位始併山南山北之地永

樂二十一年遣使請封賜詔慰諭洪熙元年遣中

官柴山副使阮漸齋詔勅冊封尚巴志爲琉球國

中山王是爲琉球請封冊立之始

中山世鑑云賜尚姓自茲始自

是定例二年一貢洪永間二次賜琉球國閩人三十六姓

皆晉江南安龍溪長樂人及福州河口人張學禮使錄云賜三十六姓以教化三十六島後多讀書

國學及充厯年貢使今諸姓凋謝僅存蔡鄭梁金林五姓萬厯三十四年續賜毛阮二姓皆住於久

米終明之世厯十二傳

正統八年封尚忠十三年封尚思遠景泰三年封尚

金福七年封尚泰久天順七年封尚德成化八年封尚圓十五年封尚真嘉靖十二年封尚清四十

年封尚元萬歷七年封尚永三十
四年封尚寧崇禎六年封尚豐 至尚豐世修職

貢崇禎十四年尚豐卒子尚賢嗣位遣使金應元
入貢請襲封會中朝道阻不得歸請封未報使者
留閩中恭遇

本朝定鼎順治三年歲丙戌 王師入閩福州通事
謝必振率留閩使者至貝勒王軍前投誠隨至江
寧府投經畧洪承疇轉送入京乃以通事謝必振
爲琉球中山國招撫使往諭六年尚賢卒弟尚質

稱世子遣本國通事周國盛齎表隨謝必振入朝
請封禮部言前明勅印未繳不便投封七年世子
復遣王舅何榜琨正議大夫蔡錦奉貢入賀船漂
沒未達八年

世祖章皇帝令來使周國盛同通事謝必振齎勅歸諭追
取故明勅印十一年七月世子遣王舅馬宗毅正
議大夫蔡祚隆等貢方物隨繳前明勅印請封

朝命遣兵部愛惜喇庫哈番張學禮爲正使行人司行

人王垓副之

賜詔書一道鍍金銀印一顆令二年一貢進貢人數不得過一百五十人續因海氛未靖張學禮等留閩四載復回京待命未行至康熙二年仍遣張學禮王垓奉

詔勅至其國詔仍順治十一年所頒

勅則康熙元年也

詔曰帝王祇德應治協于上下靈承于天時則溥海通

道罔不率俾爲藩屏臣朕懋績鴻緒奄有中夏聲教
所綏無間遐邇雖炎方荒畧亦不忍遺故遣使招徠
欲俾仁風暨於海澨爾琉球國越在南徼世子尚質
達時識勢祇奉明綸即令王舅馬宗毅等稟正朔獻
方物抒誠進表上舊詔勅印朕甚嘉之故特遣正使
兵科副理事官張學禮行人司行人王垓齎捧詔印
封爾爲琉球國中山王加賜文幣等物爾國官僚及
爾氓庶尚輔乃王飭乃侯度攄乃忠蓋守乃真誠慎

人厥職以凝休祉綿于弈世故茲詔示咸使聞知

賜王印一緞幣三十妃緞幣二十四年遣使人貢貢物
被風漂沒五年補進貢物奉

旨琉球國所進瑪瑙烏木降香木香象牙錫速香丁香
檀香黃熟香等十件俱非本國土產免其進貢其硫
磺着留福建督撫收貯餘所貢方物令督撫差人解
送來使不必齎送來京即給賞遣回六年仍令貢使
齎表入覲七年尚質卒世子尚貞攝國事按期入

貢十九年奉

旨琉球國進貢方物以後止令貢硫磺海螺殼紅銅其
餘不必進貢貢物舊有金銀罐金銀粉匣金銀酒海
泥金綵畫屏風泥金扇泥銀扇畫扇蕉布苧布紅
花胡椒蘇木腰刀大刀鎗盔甲馬鞍絲綿螺盤等
物後俱免進外有加貢物無定額熟硫磺一萬二
千六百觔海螺殼三千個紅銅三千觔二十年遣
使入貢

聖祖仁皇帝以貞恪共藩職當耿精忠變亂之際屢獻方物恭順可嘉

賜勅褒諭又

賜綵幣五十又於常貢內免其貢馬著爲例二十一年世子遣耳目官毛見龍正議大夫梁邦翰具通國臣民結狀上言請封

朝命翰林院檢討汪楫爲正使內閣中書舍人林麟焄爲副使奉

詔勅封世子尚貞爲琉球國中山王

御筆大書中山世土四大字賜王二十二年汪楫等渡

海至其國

諭祭故王尚質

賜卹銀一百兩濶絹五十疋冊封

詔曰朕躬膺

天眷統御萬邦聲教覃敷遐邇率俾越在荒服悉沛仁恩
弈葉承祧並加寵錫爾琉球國地居炎徼職列藩封

中山王世子尚貞屢使來朝貢獻不懈當閩疆反側
海寇陸梁之際篤守臣節恭順彌昭克殫忠誠深可
嘉尚茲以序當纘服奏請嗣封朕惟繼世爲國家之
常經爵命乃朝廷之鉅典特遣正使翰林院檢討汪
楫副使內閣中書舍人加一級林麟煬齎詔往封爲
琉球國中山王爾國臣僚以及士庶尚輔乃王慎修
德政益勵惓誠翼戴天家慶延宗祀實惟爾海邦無
疆之休故茲詔示咸使聞知二十二年冬王遣法司

王舅毛國珍紫金大夫王明佐等謝封附奏遠人
向化請賜就學奉

旨准令就學二十五年王遣官生梁成楫蔡文溥阮維
新鄭秉鈞四人入太學附貢使舟來閩遭風折桅
飄至太平山修船至二十七年到京入監讀書奉
旨照都通事例廩給優渥春秋四季給裘葛靴帽被褥
俱備從人皆有賜又月給紙筆墨硃銀壹兩五錢
特設教習一人博士一員督課之至三十年貢使

耳目官溫允傑等朝京國王請官生歸國賜宴各
給賞雲緞綢布等物乘傳遣歸四十八年尚貞薨
世子尚純先卒世孫尚益嗣位立三年未及請封
又卒五十二年世曾孫尚敬嗣位五十六年尚敬
遣耳目官夏執中正議大夫蔡溫入貢且告曾祖
尚貞與其父尚益之喪疏請襲封疏云琉球國中
山王世曾孫尚敬謹奏爲請

封襲爵以效愚忠以昭盛典事臣曾祖尚貞於康熙四

十八年七月十三日薨逝臣祖尚純爲世子時早已棄世臣父尚益未及請封已於康熙五十一年七月十一日薨逝念臣小子曾孫承祧然侯服有度不敢僭稱王業永存循例請襲俾臣拜

綸音於海島砥柱中流膺

誥命於波區雄藩外甸謹遣陪臣耳目官夏執中正議大夫蔡溫等虔齋奉請伏望

聖恩體循臣曾祖事例乞差天使襲封王爵上光

寵渥之盛典下效忠順之微忱庶藩業得以代代相傳

頂祝

皇恩世世不朽矣五十七年六月

朝命翰林院檢討海寶編修徐葆光充正副使齎

詔勅冊封尚敬爲琉球國中山王五十八年六月海寶

等至琉球國

諭祭冊封

詔書

與封尚貞同

勅云

皇帝勅諭琉球國中山王世子曾孫尚敬惟爾遠處海隅虔修職貢屬在家嗣序應承祧以朝命未膺罔敢專擅恪遵典制奉表請封朕念爾世守臣節忠順可嘉特遣正使翰林院檢討海寶副使翰林院編修徐葆光齎勅封爾爲琉球國中山王并賜爾及妃文幣等物爾尚祇承寵眷懋紹先猷輯和臣民慎固封守用安宗社於苞桑永作天家之屏翰欽哉毋替朕命故諭五十九年二月海寶自琉球還國王附奏請官

生入太學讀書是年冬王遣王舅向龍翼紫金大夫程順則入貢并謝封貢金鶴犀甲馬鞍等物宴賚有差雍正元年冬王遣王舅翁國柱正議大夫曾厯等齋表恭進

聖祖仁皇帝御前香燭祭品慶賀

皇上登極大慶二年十二月初三日奉

特旨令傳譯引禮通事謝道武帶領琉球王舅翁國柱召見乾清宮慰問本國歷年五穀收成百姓安樂國王

平安遂

賜琉球國王

御書輯瑞球陽四大字扁額玉器玻璃法瑯磁器端硯

緞疋等物加賜王舅翁國柱傳譯通事謝道武鈔

緞有差附舟入監讀書官生三人鄭秉哲鄭謙蔡

宏訓等

蔡宏訓在通州病故奉
理墳墓銀三百兩營葬張家灣

旨給修奉

旨令國子監臣遴選學行優長者一人教習文字修葺

學舍按月優給廩餼紙筆墨硃按季給與袍褂等

物其從人各賜衣服布疋雍正四年王遣紫巾官
向得功正議大夫鄭士絢等齎表入貢方物恭謝

天恩

貢物金鶴嵌螺龍碗嵌螺龍盤蕉
布絨畫圓屏圓屏紙護壽紙扇

奉

旨琉球國王因朕頒賜御書扁額玉器絳緞等件特遣
使臣進表謝恩貢獻禮儀具見誠悃朕加惠遠藩不
欲收其貢物但既航海遠來不忍令其帶回本國查
歷來朝鮮國王進獻禮物若不收受有交送內務府
存留准作年貢之例今琉球國王所進禮物即照此

例存留准作二年一次正貢以示朕體卹遠人之至
意十一月初三日奉

旨召見琉球國紫巾官向得功于

乾清宮

上賜琉球國王尚敬內緞二十疋玉方鼎一件玉夔龍
水注一件漢玉方壺一件玉五老壽杯一件玉異
獸花插一件玉荷葉盤一件玉龍鳳方盒一件玉
螭虎雙壽碗一件玉雲喜卮一件玉磬一件藍白

玻璃碗十件磁器盤碗一百五十件法瑯鑪瓶盒一副綠端硯二方又賜紫巾官向得功鈔緞又照雍正二年加賞之例賜該國王錦緞紗羅八十疋勅內閣撰文付來使齎回又奉

旨琉球遠隔海洋該國王收受賜物不必專遣使臣進表謝恩着於正貢之年一同奏謝將此諭該國王知之是時向得功在京未歸四年貢耳目官毛汝龍正議大夫鄭廷樞等已齎表文方物來閩禮臣議以

該國所進雍正四年正貢方物准作六年正貢其
六年應進表文俟八年正貢時一并恭進是時在
監肄業官生鄭秉哲等投牒國子監乞請

旨歸養監臣轉咨禮部具題請依康熙三十年琉球國
王題請入監之官生梁成楫等歸養事例賞賜筵
宴馳驛歸國奉

旨官生等每人加賞內庫緞二疋裏二疋從人等加賞
官緞各一疋令隨貢使毛汝龍等一同返國國王

按期循例又遣耳目官毛鴻基正議大夫鄭秉彝等恭進六年貢物毛鴻基等上言國主恭進禮物蒙

皇恩准作正貢乃

聖朝柔遠之盛心而依期貢獻實遠臣戀

主之微忱即使接貢舟舊冬已到本國國主聞知亦必遣使前來奏請云云福建巡撫劉世明奏言外國誠敬雖難固却但未合例不敢冒昧遣送來京七

年四月初十日奉

旨琉球歷年恪守臣節不失貢期而地處重洋之外使臣遠涉風濤深可軫念是以令其以四年進貢方物准作六年正貢其六年應進表文俟八年正貢一并恭進所以寬其朝貢之期與海邦休息之意也今該國王以未接部文仍按期遣使航海而來實因未知朕之明旨并非有違成例也且其船隻已經進港行李已安頓館驛寧可以不合例而却之使遠島旅臣

空往返於洪濤巨浪中乎着照例准其入貢該督撫
委員伴送來京一應廩餼舟楫從厚辦給以示朕綏
懷遠人之至意毛鴻基等至京奉

旨于

太和殿召見

賜茶

賜坐

特恩加賞該國王內緞二十疋玉方花觚一件玉靈芝

插一件玉雙喜瓶一副玉獅子壺一件玉六角壺
一件玉喜壽杯一件玉螭虎杯一件玉碗一件玉
花澆一件玉花插一件玻璃碗八件精式磁器一
百四十二件法瑯鑪瓶盒一副玉硯一方綠端硯
一方又賞貢使毛鴻基鈔緞禮臣委員伴送至閩
遣發歸國七年十月初十日奉

旨琉球地處重洋之外奉表修貢遠涉風濤朕心深爲
軫念是以從前降旨令將雍正四年該國王謝恩所

貢方物准作雍正六年正貢以示恩眷該國王以六年正貢之期仍遵定制遣使航海遠來奉表進貢情詞懇切具見悃忱着將六年進貢之物准作八年正貢若八年貢物已經遣使起程即准作十年正貢着行文該國王知之八年六月二十五日毛鴻基等齎捧

勅書部文到國國王尚敬復遣王舅向克濟正議大夫蔡文河等恭進八年分貢典方物另有疏文陳情

具奏不敢不貢者五事請仍按期納貢以完臣節
兼爲官生鄭秉哲等歸養返國宣布

聖朝教化俾本國愚蒙大啟法度昭明踴躍

皇恩于常貢外恭進嫩熟蕉布一百疋圍屏紙五千張
順附貢使具疏陳謝奉

旨琉球國八年進貢方物准作十年正貢國王尚敬以
雍正八年奏請按期入貢時陳奏在先若遵

旨十年不貢誠恐陳奏互異重負

聖天子委曲優恤深恩而十年貢使溫思明鄭儀等復齎捧貢物駕海舟抵閩矣巡撫趙國麟具疏請

旨部議該國王納貢輸誠情詞懇切應准其來使赴京進貢將進到禮物遵

旨存留准作雍正十二年正貢其應進表文仍令照例遣使赴京恭進貢物硫磺一萬二千六百觔照例於福建藩庫交納紅銅三千觔白剛錫一千觔俟進到之日照例於總管內務府交納收貯奉

旨俞允

聖恩浩蕩體恤遠藩

溫旨稠疊有加無已寬其物力鑒其微忱鮫島波臣益

修歲事於永永矣

按琉球國自前明歷朝入貢舟楫往來俱駐於泉州特設市舶提舉一員專理貢事以內官領之後移福州本朝省并其事於福州海防同知舊設柔遠驛一區在水部門外河口進貢廠以居貢使官伴水手人等後有官樓上奉天后傍爲耳目官正議大夫住停樓下有堂堂外東西向皆建樓屋官伴分別居之本朝定鼎後首先投誠入貢奉職尤謹數十年來漸濡文教康熙十一年間紫金

大夫金正春始啟國王立大成廟卜地久米村
塑聖像於廟中立四配十哲王命儒臣於春秋
二仲上丁行釋奠禮五十六年紫金大夫程順則
啟王請祭至聖先師用太牢啟聖公用少牢其
爵帛粢盛豆籩之數俱如中國祭品本國所無者
以土產代之五十八年程順則復啟王建明倫堂
又於堂北分祠奉祀啟聖併四配神主堂左右兩
廡蓄經書國王又命紫金大夫程順則刊刻

聖諭

十六條演義月令講之舊例以紫金大夫一員司
教每旬三六九日詣講堂稽察諸生勤惰兼理中
國往來貢典并參贊大禮又擇大夫都通事秀才
中文理精通者一人爲講解師句讀詳明者一人
爲訓誥師設學宮於啟聖祠內以教通事秀才之
成業者講解師督之又設學於上天妃宮以教國
中七歲以上者訓誥師督之首里那霸皆有塾學
以教子弟至今國中彬彬文雅詩書絃誦皆有華

風我國家聲名文教之盛無遠弗届矣至於凜
奉正朔貢使至京必候十月朔頒歷齋回及至國
已踰半年故國中設司歷通事官秩七品豫推算
造歷應用歷面書云琉球國司歷官謹奉教令選
造通書權行國中以候天朝頒賜官歷共得凜
遵一王正朔是千萬億年遵王歸化之義也琉
球人深目多鬚有職事者以金銀簪爲差等厠賤
祇空髮束之土人結髻於右漢裔結髻於中俱用
色布纏首紫黃爲貴紅綠次之以青爲下衣則寬
博廣袖製如道士服腰束大帶亦以色布稍貴者
纏文錦價可三五金凡屋地多鋪板凈潔不容塵
無貴賤皆着草履入室則脫惟謁見使臣始具冠
履殊苦束縛婦人以墨點手外指爲花草鳥獸形
首不簪珥顏無粉黛足與男子同屨富室以蘇蓆
藉屨底畧加皮緣上衣之外更用幅如帷周蒙背
上見人則升之以蔽而下裳褶細而制長欲覆足

不令顯也名族大姓之妻出入戴若笠坐馬上女僕三四從之無羅紋布帽織闕鏤皮毛衣螺貝之飾君臣上下各有節級王親雖尊不敢與政理武職則法司官察度官以司刑名過閭官那霸港官以司錢穀耳目官以司訪問文職則設大夫長史都通事等官以專司朝貢之事王則并日視朝自朝至日中晨凡三次羣臣以搓手膜拜爲敬尊且親者延之殿內賜酒饌疏則移時跪階下不輒起過聖壽長至元旦日王統衆官肅冠服高呼祝慶儀同內地臣僚父子幼雖同寢長必異處食用匙筋削素木爲之異味先進尊者子居親喪數月不肉食死者以中元前後日用溪水浴其屍去腐收骨纏布裹草襯土而殯上不起墳若王及陪臣之家則以骸匣藏山穴中截木板爲牖戶歲時祭掃啟視地無貨殖商賈鮮通時時資潤於隣島之富者有盜竊輒加開腹剗刑之刑鹽舶漁艇制與中

國小異陪臣入貢則乘巨艦航海而至縛竹爲筏
不駕舟楫俗敬神神以婦人不二夫者爲尸降則
數著靈異能使愚民竦懼王及世子陪臣莫不稽
首下拜故國有不良神輒告王指其人擒之倭寇
謀犯境神輒易水爲鹽化米爲沙尋即解去尸婦
名女君首從動至二三百人各頂草圈攜樹枝入
王宮中王宮建於山巔國門榜曰歡會府門榜曰
漏刻殿門榜曰奉神園堞儼然石壁矗矗門前百
武許砌石梯數重左下麓小池水自石龍口噴出
榜曰瑞泉王則汲之殿宇渾素不雕鏤爲奇巧山
則南有太平出禾芋男女領耕織其中西有古米
出土絲又有馬齒地藪曠饒蔗牧東北有硫磺葉
壁灰堆繇奴野刺普吉佳七島雜出紫菜魚蜚海
貝諸物龜鼈等巖澎湖等島蓋其大者樹有鳳尾
蕉四時不凋野鮮熊虎豺豹而獨出鹿且富牛馬
羊豕雞形多瘦削其價極廉家不畜犬愛養異色

猶有奇蛇可入藥鳥雀穀蔬果品花木稍同中國
獨不宜茶茗即藝之亦不萌虫有壁間蝎虎聲大
噪海錯如龍蝦螺蟬則味加閩越矣賦法畧如井
田王臣民各分土爲食有事暫取諸民事竣即已
婦人鬻米爲酒男子煮海爲鹽燕會亦設中國金
酒侑以歌曲陶冶如鐵耕釜甌王主其市易有厲
禁嬰皆自閩往非所有也地產貝甚多顧獨用日
本小錢如宋季鶯眼縱環每十折一厥田沙磧瘠
薄樹藝鹵莽日食飯僅一二碗地卑濕氣候常溫
隆冬洹寒亦有小雪陪臣子弟與凡民之秀則請
致士大夫教之以儲長史通事習華言入貢餘不
慧者宗倭僧學書番字而已間有學詩僅曉聲律
偶對其地去彭湖不下數十里宋志云與泉州烟
火相望閩人嘗言霽旦登鼓山可望琉球皆非也
又有小琉球與閩海稍近
未嘗朝貢或言并入琉球

蘇祿國 在西洋海島中與淳泥鎖里相近其俗山涂田

瘠宜種粟麥民食沙糊魚蝦螺蛤煮海為鹽釀蔗為

酒織竹布為業土產竹布玳瑁珍珠甘蔗舊傳其國

分為東西洞別有一洞共三洞主不相統屬

或云東王為尊

西洞別洞副之明永樂十五年東國王巴都葛叭荅刺與西

國王巴都葛叭蘇哩別洞王巴都葛叭刺卜各率妻

子酋長來朝貢珍珠玳瑁諸物賜賚給賞各有差禮

遣回國東洞王巴都葛叭荅刺歸次德州病卒成祖

遣禮部郎中陳士啟以文諭祭賜謚恭定命有司營葬德州城北為大樹碑墓上以表忠誠仍遣使封其長子都麻合為蘇祿國東王次子安都祿三子溫塔

刺留於德州守墳十九年都麻合復來貢方物

貢物梅花

腦米腦竹布綿玳瑁降香蘇木胡椒萆薢黃蠟番錫

自後遂不復至欽惟

皇上御極以來德化洋溢無遠弗届凡在血氣均霑丕冒風雨順時海波不揚蘇祿國王母漢末母拉律林傾心向化欲修職貢海道未諳會泉州人龔廷

綵至其地國王即以廷綵為鄉導充貢使同國臣
阿石丹通事楊佩寧等於雍正四年七月初五日
齎表文方物入貢廷綵故晉江縣民遂取道於閩
即於七月二十五日至泉州日湖港表章一匝漢
字表一摺番字表一摺表云蘇祿國蘇老丹臣母
漢末母拉律林稽首頓首奉表

大清國皇帝陛下萬歲萬歲萬歲萬歲竊臣僻居荒服遠
隔

神京幸際昌期末由趨覲邇來天無烈風淫雨海不揚
波知中國必有

大聖人微臣捧閱歷朝紀事原有覲光之例頓切朝
天之誠冀海島草臣得霑

聖朝寵錫以光大前模每與本國甲必丹

天朝人氏陳典策圖維欲效祖父以輸誠復邀

聖恩於海嶠緣滄溟實阻指南無車道必經由呂宋地
方彼與臣世為敵國且思必得熟海之人方能上

達愚誠臣正在思念乏人幸有龔廷綵自呂宋而到本國詢其來由因在未奉禁之前貿易至彼被其狡詐羈留難歸故里身繫異域心切中華臣視陳龔二人雖為商賈而品行端方又係

天朝士庶臣愈加敬仰委以國事臣喜進趨之有人實天假之便也又適去年有商船一隻桅舵俱失被風飄至臣國船戶林合興攬載商人李衡章陳森茂等細驗牌照係往海南生理臣念

聖朝難商即令陳龔二人引導入港安置躬請我
皇上龍體萬安通船商販頌揚

皇帝陛下繼承大統德超邃古道建大中萬國效誠普
天咸慶益信小國向之得享安瀾者非賴

大聖人治化覃敷無限修阻孰能臻此臣當竭蹶以趨
仰酬夙願今者幸來船指南之有人識重洋別道
之可通微臣自慰有志克成但恨年迫於桑榆不
得躬叩於

丹闕是用遣正使喇嘛祿達臣龔廷綵副使巴祿達臣
阿石丹奉臣赤心仰陳

彤陛敬獻本國所產土物珍珠二顆玳瑁十二片描金
花布一疋金頭牙薩二疋白幼洋布二疋蘇山竹
布二疋燕窩一箱龍頭花刀一對夾花標鎗一對
滿花番刀一對花藤蓆一對活猿一對聊效野人
負暄之意伏願

皇帝陛下念臣部落荒陬民貧國小惟任土作貢表遠

人之慕化委質事君比葵藿之傾心倘我

皇帝不棄溪毛而小國所產者望

玉勅下頒俾臣蓄積三年庶可復獻於

丹墀則野莽草僚叨沐

恩榮不朽矣臣不勝誠惶誠恐謹拜表以

聞那兒阿希兒一千一百三十八年流路加噫打月亦

實念日疏總督高其倬檄有司吊進內港安插具

摺奏

聞奉

旨蘇祿國遠在海外隔越重洋從來未通職貢今輸誠
嚮化甚屬可嘉閩省起送來京之時着沿途地方官
護送應用夫馬食物着從厚支給以示朕加惠遠人
之至意隨遣布政司經歷沈士升伴送進京雍正五
年七月奉

旨照加賞琉球國例賞該國王蟒緞六疋青藍綵緞十
疋藍素緞十疋衣素緞十疋閃緞八疋錦六疋綢

十疋羅十疋紗十疋

勅內閣撰勅付來使帶回本國正副使龔廷綵阿石丹
通事楊佩寧給賞綵緞羅絹有差俱於 午門前
賞給禮部筵宴二次遣回福州筵宴一次遣發歸
國雍正十年 缺月蘇祿國王又遣使臣龔廷綵至
閩具表恭謝

天恩另疏奏請伊國遠祖東王巴都葛叭哈刺於前明
永樂十五年率眷來朝受封歸國歸途病故勅葬

於山東德州地方所有墳塋經今三百餘年廢墜已久乞懇

聖恩勅所在地方修葺並存留內地看守墳塋子孫懇恩給復賙卹禮部遵

旨行文山東省巡撫確查蘇祿國王墳墓子孫并春秋祀典賙給銀帛之處山東巡撫岳濬咨稱前明永樂年間蘇祿國東王巴都葛叭哈刺朝貢歸國歿于德州地方命有司營葬賜諡恭定長子都麻合


襲封歸國次子安都祿三子溫塔刺留於德州守
塋其墓現在州城迤北神道享亭悉已坍塌其子
孫襲其祖名分爲安溫二姓不通婚姻彼時照丁
月給口糧一石各給布花柴薪等物至萬厯中年
人衆漸增始行停止至今德州祀典內尚每歲額
設蘇祿國王祭祀銀八錢按年奏銷現今東王喬
孫安汝奇溫崇楷二氏老幼一百九十三人俱係
蘇祿國嫡派子孫列在編氓并前明碑文一道給

糧印結五紙呈驗覆疏請

旨雍正十一年六月初十日

特允部議令山東巡撫轉飭地方官清查蘇祿國東王
墓址其神道享亭牌坊估計修葺支用正項錢糧
額設春秋二祭令其裔孫安汝奇溫崇楷二人立
為族長看守墳墓并於二族中擇稍通文墨者一
人照各省奉祠生例給與頂帶以奉東王之祀缺
出遞行遴補永著為例

按蘇祿國為狍子種類所居在海山小島築外木
內石牆垣一道長二里許以作防守聚居不過千
人無銀錢使用率以布疋米穀相交易來時用南
風須五六七等月回國用北風須十一十二正等
月



福建通志卷六十四

欽定四庫全書

史部

福建通志卷六十五

詳校官監察御史

臣陳化龍

檢討

臣德生覆勘

總校官檢討

臣

何思鈞

校對官中書

臣

汪墉

謄錄監生

臣

唐作梅

欽定四庫全書

福建通志卷六十五

雜紀

祥興

紀雜事於志乘之末如塵加嵩嶽霧集淮海雖未
有益不為損也宋洪邁採遺事著隨筆壽昌清閒
之燕閱而善之謂其議論有裨况夫日星之變崔
符之警木石之殊尤蟲魚之怪異以及謠言識語
若信若疑駭見奇聞乍明乍滅事類繁多難可條

品薈而萃之大可知戒懼預不虞小亦藉以解頤
引為比事取資固不一而足也逸詩曰雖有絲麻
無棄管蒯信夫作雜紀

福州府

唐大厯二年秋大水

建中三年大旱井泉竭疫死者甚衆

貞元四年軍亂逐觀察使吳詵大將郝誠溢自稱留後

六年福建道疫 十三年罷牧馬

先是觀察使柳冕奏於閩中開

監牧馬至是觀察
使閭濟美奏罷之十七年劍池水赤如血

太和二年福建進瑞粟一十莖

開成五年夏蝗疫

大中二年七月福建觀察使殷儼進瑞粟十莖莖五六穗

乾符五年十二月黃巢陷郡城殺戮無算 乾符間羅

源縣留錢山上雨錢滿山以億萬計樹木皆折

郡志云乾

符中邑人池錫家
一夕雨錢數萬

景福二年王潮陷福州殺留後范暉

暉為觀察使陳巖墻巖卒自稱留後

昭宗即拜潮為福建觀察使潮卒其弟審知代之

乾寧四年唐以福州為威武軍拜審知節度使 五年

福寧黃崎港雷震水中巨石碎之海船利涉人謂審

知德政所致號甘棠港

後唐長興三年王璘僭稱帝國號閩

晉開運三年丙午南唐李景兵滅王氏

宋太平興國八年二月知福州何允昭獻芝二本

至道二年詔福建民負人錢没入男女者還其家四月
福清長樂雨黃黑豆堅實異常 四年除民歲丁錢
景德二年颶風為災詔賑之

大中祥符元年連理芝生於龍眼樹上次年又生於荔

枝樹是年遣使取占城稻種

宋真宗以福建田多高仰聞占城稻耐旱遣使

求其種得一十石以遺其民使蒔之
今八郡皆有占城稻語本湘山野錄

五年十二月

侯官山生芝五十四本閩縣聖泉寺生芝十本

天聖四年大水有詔賑恤 六年除福州民逋官莊錢

十二萬八千緡

政和二年福清龍首橋溪漲深數丈有魚騰波浪間沒

民居數百家

時儀曹林摯與其弟攀挈家寓文興亭俱沒

靖康元年八月福州軍亂殺知州事柳廷俊

建炎四年詔奉安祖宗神御於福州時御舟航海將避

於閩

按鶴林玉露福州啓運宮在開元寺有七祖御像南渡初載以朱輦七乘列於殿廡專差中官

主香火節序朝廷遣帥守致祭

是歲建州范汝為作亂福州城中大

震

紹興二年饑斗米千錢令憲臣移廣東粟以賑 六年
春又饑 十八年侯官縣竹實如米饑民採食之
二十年冲虛觀皂莢木翠葉再實 二十年大水入
城漂閩侯懷三縣田廬憲臣樊光遠不以聞坐黜
隆興二年正月福建諸州地震是年大旱

乾道二年福清石竹山大石自移聲如雷石方可九尺
所過成蹊山之木石如故 三年秋霖雨禾麻菽粟
多腐

淳熙四年夏大水漂民廬數千家 五年大水漂圮古
田縣治 十二年饑令守臣賑貸 十四年旱令有
司賑之

紹熙二年四月霖雨至於五月大水侯官懷安古田閩
清官民廬舍俱壞 五年九月雨至於十月 十一
年四月不雨至於八月

嘉泰二年古田縣大水漂官民廬甚衆溺死數百人
開禧元年旱是歲又大水詔賑之 十四年旱詔賑恤

嘉定四年十月福州一夕再火燔城門僧寺民廬千餘家
十三年饑人食草根 十七年五月大水侯官
甘蔗砦漂數百家多溺死者水口鎮民廬皆盡是年
秋颶風大作損禾稼

紹定三年蝗

端平七年大旱詔州縣軍旅之後遺骸棄道路感傷和
氣令有司收瘞之 十二年大水詔賑之

寶祐元年旱詔賑之

景定四年颶風十一月火

咸淳十年長樂福清大旱

景炎元年夏五月乙未朔端宗即位於福州以大都督府為垂拱殿便廳為延和殿是日有大聲出府中眾皆驚仆二年元大將董文炳帥師入福州宋御舟遷於海

宋季時書錦坊有賣米者一夕雷震死其家三人屍上

大書九字其文曰六口凡八辰口凡八登

時盜起民貧者買糠

充饑見雷文九字人不能辨一老者過之曰但於每字中直貫一豎則成文矣蓋謂米中用水康中用木也查

元元貞二年饑賑粟有差

大德六年饑五月丁巳賑以糧一萬四千七百石

至正四年自三月不雨至於八月是年夏秋大疫六

年寇入連江十四年大饑人相食二十三年連

江縣有虎入城羅源縣猛獸害人非虎非熊或曰駁

馬云是年譙樓鷓尾吐氣如霧二十四年七月

白晝獲虎於郡城西

明洪武元年大將湯和由海道入福州兵不血刃執陳友定歸於京師四年永福賊溫九作亂掠鄉里有司捕之逃去後復來寇義士楊惟吉率衆圍獲之

二十年大旱二十一年長樂大水

永樂十年長樂首石山鳴

識云首石山鳴出大魁是歲馬鐸及第後六年李騏又及

第

正統八年戊辰沙尤賊鄧茂七作亂福州山賊攻劫諸

縣殘破羅源古田永福閩清死者不可勝計處州賊復乘亂入連江福州戒嚴避寇入城者日以千計

成化十三年火燬還珠門及民廬數百家十六年長

樂縣十八都昆田里突起小阜高三四尺人畜踐之

輒陷明年復於其左湧起一山廣袤五丈餘是年大

疫民多死十八年長樂半占山崩壓居民廬舍有

死者連江大水壞縣公署學舍倉廩壇壝民畜溺死

不可勝計十九年六月庚辰大風雨拔木發屋公

署民廬盡壞城上敵樓頽毀一空福州九縣濱江近
溪屋宇蕩折尤甚官私船漂沒無算死者千餘人
二十年十二月戊寅地震有聲二十一年三月雨
不止至閏四月閩縣侯官懷安古田閩清連江羅源
永福八縣俱大水民多溺死繼復大疫死者無算
二十二年旱古田連江大疫二十三年春大旱無
麥秋大旱無禾羅源賊劫縣庫官軍捕獲之

弘治七年正月還珠門火延燒居民二百餘家十一

年春長樂十九都靈峯上產芝二本 十四年古田
白水寇逼縣城官軍殲之 十六年長樂馬江大風
覆舟死者數百人

正德三年還珠門火延居民廬舍百餘家 四年連江
地生白毛 十二年四月地震是歲地五六震皆有
聲 十三年四月雷震常豐倉五月雷震東城是月
福州三衛軍作亂初官軍月餉八斗給之價布政使
伍符以糴賤裁之軍士訴御史議未定有進貴葉元

保者富而黠遂鳩黨盟城隍鼓譟通衢鑰七門以守
執伍布政子及其壻將殺焉城中大震致仕都御史
林廷玉副使高文達出諭乃定八月貴等復亂太索
城中金銀聚衆屯開化寺林中丞高憲副復出諭密
會兵備副使李志剛潛計討之姚景通者貴黨也分
金不平請為內應李與鎮守謀率北門軍攻貴貴走
追斬之盡殫其黨 十四年長樂大雨雪

嘉靖四年梅花鎮海水忽變赤色經旦復清魚蝦可數

五年夏大旱知府汪文盛奏蠲租賦九年侯官

獄囚反時正月二十九日夜也初侯官令黎文會素
酗酒守獄者得囚金縱之林汝美者故縣吏也以殺
人論死與劇盜車小二私以兵器藏瓜中率衆斬關
而出殺令趨南門將逃於海時三司晨候御史於南
察院遂殺布政查約參議楊瑀都指揮使王勣經歷
周煥賊逸去後頗追獲是年四月長樂大常山鳴
十一年春大雨雪里巷中羣犬驚吠是歲閩果不

實 十三年二月雷震萬歲寺浮屠火光如炬照耀
城中 十八年閏四月颶風大作屋瓦皆飛 十九
年賊寇連江 二十一年羅源大水山崩沙壓田長
樂饑大疫 二十三年大饑巡按御史何維栢賑之
何尋以劾大學士嚴嵩逮詔獄士民哭送道輒不得
行 二十九年地大震海賊入長樂 三十年雨石
於連江有聲如雷十一月福州地震 三十一年二
月烏石九仙二山產珠郡人競取之着手輒碎 三

十四年六月大雨雹倭寇福清海口鎮殺數百人大掠而去 三十五年正月大雨雹是歲民間訛言有海驪精狀如螢着人衣裾必死城中家擊金鼓若防巨寇夜不帖席有道士市符治之有司疑即道士所為也將置之法道士逸去怪亦絕 十一月大雨雪三十六年正月改浙江巡撫都御史阮鶚於福建從侍郎趙文華奏也 八月倭數千人由海入寇至福寧轉掠而南逼省會四郊被焚火照城中死者枕

藉南臺洪塘民居悉為煨燼巡撫阮鶚竭庫藏並括
民間金帛賂之倭托言風未順遂駕巨艘捆載揚帆
而去 三十七年正月倭仍連艘環泊梅花定海等
處戕殺男女備極慘毒掠富家兒揭名於路令以數
百金行贖則放還沿海廬舍焚燬一空 三月詔錦
衣衛逮巡撫阮鶚赴京以言官劾其刮民間金幣賂
賊故也阮自浙參政超拜浙撫尋移鎮閩意不在兵
未一年所費閩庫銀六十餘萬 夏四月閩各縣李

樹上生桃福清縣有猪蛻殼色如丹 四月倭蹂連

江踰北嶺復逼會城轉攻福清陷之執知縣葉宗文
劫庫獄殺掠男女無算焚官民廨舍一空訓導鄔中
涵舉人陳見死焉 三十八年倭由福寧寇福州城
門晝閉遂掠近郊陷永福而遁義士謝介夫戰死

五月倭攻福清巡按御史樊獻科劾巡撫都御史王
詢參將黎鵬舉失律奪俸抵罪有差 三十九年倭
舟尚屯沿海巡撫劉燾下令大開城門往來不禁親

率兵追賊於閩安鎮劉精騎射家蓄健兒數千輩俱
習戰賊懾其威名遁去 四十年倭寇泉州分其黨
圍福清廣兵王鳳等作亂自江西度關欲乘虛窺福
州至茶洋聞有備不敢下劉巡撫單騎諭之還所掠
男女七百餘人 四十一年正月朔地震有聲三月
三衛軍郭天養等作亂

先是巡撫游震得遣兵征古田山寇通判彭登瀛與指揮

王豪爭禮不相得師旋無功彭通判委罪於指揮巡撫怒斬隊長四人三衛軍因聞教場大譁侮辱監軍副使汪道昆圖之自旦至暮馬侍郎森陳參政元珂出諭乃定 八月倭攻福清圍未

解游巡撫告急於浙江總督胡宗憲遣參將戚繼光與都司戴冲霄把總胡守仁等率兵萬人由間道趨

閩 十月衛軍郭天養等再作亂

以藩司勾算月糧衆譟聚鼓樓前公

署皆開天養等益驕突入龔祭酒用卿家斧其柱燬莆田黃侍郎大用新構將軍山居侍郎馬森復出諭散 四十二年戚繼光大破倭於興化既解其圍趨

福州合擊長樂賊破之斬首二百餘級倭屯海上者

盡遁殘寇五百由北嶺窺會城千總胡世斌驅之多

赴海死

先時倭為閩患累年華亭徐相公憂之薦劉巡撫又不合於嚴相病免閩亂益滋山寇起

衛兵驕人洵懼莫保其生至是徐相得專政柄適倭陷莆乃與兵部尚書楊博謀起拜參政譚綸為御史大夫又以巡按福建御史李邦珍屢薦戚繼光戰功用為總兵發南京庫帑二十二萬兩助餉譚綸至以戚麾下千人自衛始申法令峙糧儲為滅賊計召亂軍郭天養誅之三衛股栗山海諸寇以次討平由是流亡復業閩人始甘食其土矣

四十五年正月朔地震

隆慶元年詔蠲福州逋稅

萬曆二年八月晝暝空中有聲如雷地大震方山巨石墜於田 五年巡撫龐尚鵬奏蠲福州軍餉未輸者數萬兩 六年五月大水侯官懷安稼損十之八是

秋大旱 七年正月丈量官民田畝

先是昇平日久田畝冲崩及里

胥飛洒各縣浮糧難以數計巡撫劉思問奏請丈量報可乃沿坵履畝逐一清丈然姦猾舞文其害尤甚不過取足原額而已 三月裁懷安縣併入侯官縣問閭之病未廖也

六月新作貢院成

時給事中蕭崇業冊封琉球暫為使館家人弗戒燬於火至是重建

東西號舍始改砌以磚

十八年正月不雨至秋八月 十九

年夏大旱 二十年三月二十五日星隕於閩縣東

南者三 二十一年閩縣知縣王仰為家奴毒死仰

子廷試手殺家奴三人於城隍廟 二十二年二月

不雨至夏五月穀湧貴饑民大譟掠劫城中越三日

乃定

先是連歲不登三四月間每石穀價至五錢闔城米肆盡閉東門李章家故饒倉多陳朽列米

於肆故高其價令糴者鱗次而入有陳七者往糴自辰至午不得入乃大譟於門李毆之眾乘機遂亂盡掠其米入焚其倉烈焰亘天巡撫許孚遠聞變遣坐營古應科提兵捕之克首逸去所縛者收拾灰燼之饑民而已次日解赴軍府孚遠陳兵於門出旗牌欲梟之布政使管大勲兵備僉事張喬松入見求寬解始網打割耳以徇是夜鄧三鼓眾攻焚古應科之屋為卒所擒吳和尚挾讐劫燒北門蔡審理家城內外聞風搶掠者十餘處巡撫許孚遠始部浙兵分布城中固守各巷口柵門戒人夜出又次日大發倉廩亂遂定後巡撫金學曾

至斬鄧三等於市

二十七年督礦稅太監高寀

至二十九年八月毀九仙山新臺

初內使建臺於九仙山之巔及

烏石山之麓形家以為非宜後諸生以闢路毀其亭尋復建三十九年巡撫丁繼嗣言之內使遂撤去

三十年七月颶風作長樂渡舟覆溺死三十餘人

八月二十五日夜長星亘天頭大紅色尾尖白色

三十二年十一月初九日地大震有聲

時方夜動搖不止屋

若將傾人爭驚避牆垣多頽塌

三十四年八月初七日大風陽歧

江五舟並覆溺死千餘人

是時興泉漳三郡生儒就試不得入急欲發舟舟人

止之不從中流起風五舟俱覆乃訛以為峽江誤也

三十六年五月大饑

時連

年荒旱巡撫徐學聚給引招商聽其興販於是商賈轉運江干鱗集穀價雖騰民鮮饑色江淮蘇松之米浮海入閩自徐公始民受其賜大矣九月閩縣鼓山石崩有聲如雷

十一月二十二日東城守門軍蘇九郎妻鄭氏一產

二男二女十二月十七日巳時布政司火藥庫火

庫四旁皆隙地局鑄甚嚴中有佛狼機銃數門忽火自內出奔突衝擊人皆驚仆滿城屋瓦盡震

三十七年五月二十六日大水入城

先二日建寧蛟水發衝壞城郭

漂流廬舍壓溺男女以數萬計是日將樂順昌等縣蛟水亦發所蕩村落悉為邱墟二十六日澎湃而下勢若奔馬會城中平地水深數尺郭外則丈餘矣浮尸敗椽蔽江塞野五晝夜不絕故老云二百年來所

未睹也水皆渇濁色人不敢飲於江者匝月當事以災聞奏請蠲賑然是時水旱遍宇內朝廷亦不能每人濟矣八月大雨初六日烏石山崩

山南仁王寺旁有新立阮公祠暴雨

山崩祠盡燬壓死者數人

是月風雨彌旬初六日貢院內水深數

尺文場垣舍傾壞巡撫御史陸夢祖改初場試期至

初十日始入試三十九年改大田驛官路由扈與

至仙岐渡江抵陽岐入省

尋又改從吳山過江

是年羅源縣羣

虎為虐知縣陳良諫禱於神捕獲四虎害遂息四

十年二月十一日大風馬江渡覆死者百餘人四

十一年羅源縣大旱 四十二年九月長樂后山民
房發火有龍起於鼓尾潭大雨火滅 四十三年八
月永福縣大水漂流城郭田園人畜渰死無算 四
十六年秋分夜東方有雲赤白色形如刀長丈餘累
月方消

崇禎五年三月大雨雹麥無粒收 是年劉香劫連江
諸生趙瑞印率鄉民陳其惠等禦之遁去其惠戰死
九年劉香海舟入長樂松下民竄三日絕烟 十

年十一月十九夜西南有物如流星下墜大如瓜至半而滅其光燿耀 十二年連江浦口地裂出血噴激丈餘 十三年長樂縣風雨大作拔枝發屋濱海如洗 十四年正月二十八日雨水如黃泥 五月二十日大水城渰及半 七月初一夜大風拔木發屋公署民廬盡毀城樓皆傾倒覆舟無算 八月城中野外果木皆華 十五年九月二十七夜南門火延燒千餘家

國朝順治二年六月二十七日明唐藩入閩是夜有星
形如長刀 三年二月十四夜芝山寺火延燒鐘樓
靈源閣及民廬 五月十八日積雨遂成巨浸城中
水深六尺 九月十八日

王師入閩兵不血刃居民安堵是月二十日執齊巽張
份張質江不空戮之 十一月初三夜開元寺火

五年春福州大饑

先是丁亥七月四郊多壘路途阻塞米價日騰城中多餓死初食草

根水萍繼而爭啖人肉每遇市曹戮人啖割無餘或誘幼孩入戶而剗之甚至自刃其子巡按周世科更

立礫磨釘剝之法濫及無辜閏四月總督陳錦
兵至悉除苛政運米賑濟禾稻漸熟民慶更生 十

四年固山郎賽出鎮閩省圈東湯二門民居北至湯

關間南至水關間以河為界駐兵 十六年七月二

十八日颶風大作樣樓開元寺壞 十七年靖南王

耿繼茂入閩鎮守次年復圈民居相橋上河西一帶

及水部門外民居至河口止 十八年五月鹽運司

王志佐刑拷生員鄧謨謨自刎於明倫堂福州獄興

諸生林芬等幾罹於法巡按范平疏救之 是年夏

大水漂溺廬舍秋移沿海居民於內地 七月初一
日火燒雙門樓第一樓延及民居千餘家

康熙二年十月彗星見 三年羅源羣虎噬民 閏

六月永福縣大水漂溺城郭衝陷田園廬舍 四年

彗星見西方 六年五月連江縣金鐘潭風浪驟作

雲霧蔽天有龍自潭躍出鱗甲俱現從西北去 七

年八月大水漂流廬舍田園 十二月總督趙廷臣

閱界展復移民 十一年十月十七日連江縣地大

震每晝夜十餘次至十一月二十一日乃止 十二年七月雷火樣樓 是秋白氣見西方形如長劍
十二月初一日羅源縣連日地震 十三年三月十五日耿精忠反 十六夜大雨震電雷碎耿精忠府
鷓尾 十五年九月十六夜總督范承謨被害賓幕
稽永仁沈上章王龍光李全弟范承譜領壽王天祐
家人于通等五十餘人皆被害是月康親王統師入
閩萬姓懽呼載道隨疏免十六年分併以前錢糧

十七年秋海寇焚掠五里渡及港頭起步一帶居民
十八年再移展復居民於內地 五月長樂縣大
風飄屋 十九年大水屬縣田廬皆漂溺 十月彗
星見 二十年永福縣大旱禾稻絕收是年總督姚
啓聖疏請盡復原移沿海居民 二十一年正月二
十三日還珠門火延民居數百家 四月大水田廬
多漂溺 六年五色雲見 十月譙樓前火延燒總
督轅門 二十五年九月 詔免本年未完錢糧併

二十六年上半年二十七年下半年錢糧 三十年

三月十七日地震泥土生毛 秋蝗為災潮水驟溢

三十五年北武庫災延燒居民百餘家牆屋傾壞

有壓死者庫中火砲齊發飛出北郊外 三十六年

正月二十九夜有星如帚尾向西南 三十七年福

州知府遲維城毀五瘟神齊天大聖諸淫祠 四十

一年八月十五日羅源縣大雨驟寒雪峯寺山中有

雪 四十四年十月地震 四十五年春夏鼠害苗

三播俱遭傷冬月僅半收 四十六年三月初八初

九兩日午時日重暈初九初十日月重暈春夏秋饑

商販海運米至民賴之 四十七年春多虎遊擊陳

騰龍率鎗手與小橋鄉民斃六虎患遂息 七月二

十日申時有星數百光芒燦列自東流入金鐘山後

老人云
是星車

四十九年洋盜鄭盡心等聚衆行劫巡撫

黃秉中購獲之械送

京師 十月 詔免四十八年以前積逋仍免五十年

全年錢糧 五十二年夏大潦市可行舟 五十六年五月初四日大雨黃金鐘山頂石壓土崩其聲如雷 五十八年四月福清匪類薛彥文等聚衆侯官縣石壠地方潛謀為匪事洩官軍掩捕之獲彥文絞之於市 五十九年五月大水入城市肆舟行壞廬舍田禾巡撫呂猶龍於安泰橋水中哭拜水尋退 六十年正月二十七日大雪平地尺餘

雍正四年八月初八日大雨水淹號舍士子涉水入闈

是月連江羅源二縣山水暴發淹沒田畝三十三頃
三畝零 詔免二縣並福右衛中衛錢糧二百五十
五兩一錢四分米三十四石零 六年閩縣侯官長
樂福清閩清五縣秋旱 詔依被災分數蠲免錢糧
五縣共免二萬二千二百五十八兩五錢六分零

十一月初六日 詔閩省州縣有數處微欠雨澤將
康熙五十五年起至雍正四年止帶征民欠地丁銀
三十三萬八千三百餘兩概予蠲免 九年大有年

十年正月十四夜布政司署火 是歲又大有年
十一年七月十二日午時永福縣五色雲見層層
煥采光華射目歷未申二時不散

興化府

唐貞元八年三月甘露降於莆田縣文賦里潘嶺之原
宋太平興國三年游洋民林居喬等作亂自號西平王
涵江人陳應功戰死漕使楊克讓討平之 九月颶
風拔木壞廨宇民舍千八十區

雍熙四年十二月甘露降羅漢峯前五松上

端拱二年八月雷震郡民劉政有文在胸曰大不孝

淳化四年正月知軍馮亮獻芝草

咸平九年紅橘連理又黃橘附桑枝而生

大中祥符四年詔免丁身錢

慶厯五年減人戶身丁米

皇祐二年詔減丁米

熙寧十年饑

元祐五年颶風大作邊海居民漂蕩萬數

崇寧元年旱

大觀四年十二月二十日大雨雪荔枝樹皆凍死

紹興七年秋試揭榜醺樓有紫氣光焰亘天

明年黃公度陳俊卿

及第

九年五月甘露降壺山溪瀆村芝草生 十五

年山寇周老虎等犯仙遊西鄉武翼郎袁章義民
丘祈戰死 二十年四月飛觴臺東南產芝如嬰兒
拳旬日其大盈尺小者亦數寸初生色如塗金旬日

如凝脂又如渥丹後變如紫暈金又軍治大廳有五
色雀集榕木上芝產後圃麥秀兩歧 二十七年興
化縣夾漈溪一夕白氣燭天久而不滅無何鄭樵
以遺逸召
隆興二年莆田縣饑詔守臣及常平使者賑之

乾道三年免猶剩米 四年游洋民鑿井二丈餘得石

有文曰石上狀元

明年鄭僑及第清
源石起宗亞之

淳熙二年仙遊縣九座山古杉生花其臭如蘭 五年
閏六月乙巳夜風雨暴作漂莆田廬舍十一月無禾

令守臣賑粟貸種

紹熙四年海風害稼

嘉定九年五月大水漂田廬害稼十五六

德祐二年十二月元陷興化軍執樞相陳文龍後不食
死

景炎二年十月元屠興化軍通判權知軍事陳瓚死之
元至正十二年居民陳居信等陷仙遊縣城 二十五
年十月壬申地震有聲如雷

延祐三年六月仙遊縣南橋溪中涌出開元錢背有閩字或福字

至正十九年三月雨麓連日 二十五年十月地震有

聲如雷

明永樂三年莆田縣學泮池生並頭蓮

明年林環廷試第一

十四年大饑

正統中興化縣大疫虎兇縱橫

景泰元年莆田縣學泮池生並頭蓮

明年柯潛廷試第一

缺年

春夏大旱斗米二百錢 六年大旱民艱食

天順三年莆田北山諸村落虎為害傷人畜以數百計
白晝數十人同行亦有被傷者山中數月絕人跡

成化八年虎復為害傷人畜不減天順三年之數 十

二年夏秋旱大饑知府陳表以聞詔免田租十之三

十五年虫傷早禾大饑境內無可糴者 二十二

年夏旱六月己巳地震有聲九月丙寅又震 二十

三年春旱無麥秋大旱無禾知府丁鏞申奏准稅糧

折色

弘治六年颶風大作海舟入平田官為鑿渠乃出秋無
禾 九年莆田廣業里資國寺僧徒烏七三等作亂
營於仙遊興泰里勇士魏昇擊殺之寺廢 十年七
月十二日雷雨晝晦大風飛瓦大樹皆折 十一年
四月霖雨連日蛟龍為孽山崩水溢有豹乘水至龜
塘樹上牆垣廬舍皆壞五月大雨復作寧海橋壞
十二年夏秋冬三時不雨井塋溪塘皆涸詔蠲田租

十七年六月初一日壺山上慶雲見三日六日九日又見

嘉靖二年七月初四夜火光見東北隅良久乃散初五夜星入於月是月廣寇由大總至典史汝良知縣張廷槐從子世清戰死十八年九月府城災十九年大有年二十二年五月十八日壺山上五色雲見七月二十六日星流如火二十八日晚石室巖後雲氣如人馬旗幟久之乃散二十四年大饑三

十五年七月天鼓鳴雨雹 三十六年十一月赤青
見莆田江口橋石梁斷 三十七年六月天鼓鳴

三十九年五月雨毛大風雨雹拔木飄瓦 四十年
自夏徂冬倭三入寇是夏雨毛秋有獸渡海入惠洋
形類羊大如馬府城東關外豕生豚一頭六足 四

十一年春大疫立春日行禮於城樓六月倭復入寇
參將戚繼光來援斬獲千級八月初旬紫帽山鳴三
夜十一月倭圍府城二十九日四更城陷

時分守翁
時器怯懦

寡謀巡撫游震得遣總兵劉顯來援不敢進遣兵八人齎牒詣城為倭所得殺之衣其衣持牒入城時器不之疑令守北門遂引倭入城時器與通判李邦光參將畢某俱遁去署郡事延平同知奚世亮訓導盧堯佐縣尉葉倭屯六十餘日乃趨平海衛總兵戚繼時蘭皆死之

光援師至大破之 四十二年大風雨海水溢至府城外十二月倭攻仙遊縣知縣陳大有固守總兵戚繼光援至倭遁是年巡按御史李邦珍郡人御史林潤疏請免田租三年悉蠲逋負從之

隆慶元年免民田租之半二年至四年免田租十之三

四年夏風雨雷電大作八月初七日大雨三日蛟
起於壺山山崩數丈 五年七月二十日當午雙龍
見於東華山黑霧迷漫大雨如注色黃氣腥有頃雨
止一龍湧水高丈餘長亘野聲如烈爆勢如激潮其
一初甚小須臾復墜躍起長數丈漸至竟天擎雲搏
霧身如水牯腹背正白鱗甲飛動金色閃爍不可正
視 六年莆田縣文賦里有大蛇吞鹿遙視蛇腹下
有字

萬曆三年七月四日龍起東北方大雨如注 五年七

月彗星出西南踰月乃滅 七年六月雷震廣化寺

樹樹下有龍文金碧隱見 十四年莆田孝義里地

裂丈餘水湧出黑沙味如硫黃沙上多牛跡是年大

旱次年又旱無禾 十六年冬莆田廣業里人曾廷

邦柯守岳等作亂自號游天王次年知縣孫繼有捕

殺之 三十二年十一月九日地大震城崩數處田

地皆裂出黑沙味如硫黃水盡涸 三十三年大有

年 三十四年大旱斗米二百錢詔免田租十之一
三十七年四月五色雲見北方 三十八年大有
年 三十九年六月龍起於府城西關外之北磨山
山崩水湧大雨如注八月五色雲見紫帽山冬大有
年 四十年正月晦火光見府城中光耀異常是夜
四鼓又見四月十二日雨雹大如拳風雨大作折木
飛瓦 四十一年二月十日日中黑光摩盪秋大旱
崇禎二年七月二十日雨血 十二年八月十七日大

風飄屋拔木九月雨豆 十六年五月雨絲冬地大
震有聲如雷 十七年仙遊縣山寇陳尾等作亂知
縣吳堂討平之

國朝順治三年十月初一日大師至市不改肆 四年

莆田山寇潘重勒仙遊縣王士玉海寇楊耿等作亂

時穀價一
石五兩

五年三月山寇陷府城攻仙遊縣知縣

孫之平擊却之七月大師復府城 十年八月山寇

郭爾隆作亂屯寒硎山民受其殘暴 十一月海寇

又至屯黃石沿鄉索餉 十一年秋仙遊大飛山石崩 十二年正月初五日寇陷仙遊縣知縣陳有虞都司王嘉禎死之 十三年正月大雨雪深三尺許十四年七月十二日海寇大至舟泊三江口入涵江黃石等處焚掠六七日掘東角珠長堤盡運米穀財帛以去 十六年九月三十日颶風大作東角一派長堤盡壞海水淹入晚禾絕粒 十七年正月大雨雪 詔官司賑恤流民分別紀錄加級秋禾生鎗

十八年徙沿海居民於內地

康熙二年夏大雨兩月不止水壞田廬 三年春夏大旱七月大水漂蕩民居無數 四年饑民有鬻妻者巨盜范伯畧等數十人發掘前代公卿墳墓攫取殉葬金寶懸尸於樹以出水銀分守熊可智嚴緝之始伏法 六年大有年 八年 詔界外近地各展五里許民築室耕種 十三年三月十五日耿精忠反十八日偽檄至府城兵乘亂大掠九月隕霜殺禾冬

饑 十五年十月海寇據府城掘太平山為營斬木
郡來龍盡被斬斷 十六年正月二十九日 大師
至二月朔大敗海寇於太平山殺二千餘人寇夜半
棄城遁翼日提督段應舉統兵入城秋毫無犯萬姓
安堵 詔全蠲本年地丁錢糧 十七年六月二日
夜大風雨光焰燭天飛瓦拔木 十九年春旱穀每
石三兩八月初七夜仙遊大雨山崩水漲自南溪至
瀨溪下柯等鄉漂沒廬舍男婦無算菜園頭村男婦

溺死一百二十餘人寧海橋折五門 二十年十月
二十二日後街火燬民舍數百間 二十一年自六
月不雨至次年四月 是年盡復界外居民開墾耕
種民皆樂業 二十三年五色雲見西南方 二十
五年秋七月地震有聲如雷 二十六年五月十七
日大風發屋拔木 三十年春旱地生毛七月十五
夜大風二十九夜又大風海水汎溢入堤淹沒沿海
田廬海船隨水漂入沙隄五龍地方 三十五年春

夏大旱早禾無播南北二洋溝渠盡涸 三十八年
郡諸生黃夢千年登百歲步履安閒燈下能作蠅頭
小字知縣金臯謝以風高洛社扁其門 四十二年
春旱四月十五日始雨早禾大歉 四十三年早禾
大熟

泉州府

唐貞觀二十年蝗 二十一年八月海溢

宋太平興國初仙遊盜起圍郡城通判喬維岳固守轉

運使楊克讓率兵破賊圍解

至道三年五月甘露降

咸平三年二月甘露降

天禧五年三月甘露降

治平三年六月大雨城市水漲壞民屋數千百家
四
年秋地震有聲如雷

熙寧二年大風雨溪潮漲溢損田稼漂民廬舍
十年
饑

紹聖三年七月大水三日壞城郭廬舍

崇寧元年大旱水泉涸山中民汲水於二十餘里外人多暍死

紹興十三年郡中盜四起有周老虎詹鐵义者擁衆數萬逼郡城鄭振擊之遁去

乾道三年五月郡城火是月丙午大雨四旬晝夜不止
淳熙元年十二月郡城火燔城樓及民居 七年江賊
沈師作亂泉郡大震太守程大昌統制襄師武討之

賊遁 十一年四月不雨至於八月是年無禾令守
臣賑粟貸種

嘉定九年大水漂田廬害稼 十一年海寇趙希邵等
衝突園頭知府真德秀請移寶林寨兵戍立寶蓋寨
分地巡檄獲趙希邵誅之 十六年秋大水壞田稼
是年永樂山之東有橘一株隨人取食懷之而歸則
變為蛇腹又樂山龍潭中有人釣得魚忽變為雙髻
嬰兒

元至元二十二年二月地震六月大水

泰定元年十一月南安饑賑糴有差

元統元年六月霖雨暴漲漂民居數百家

至正十年十月安溪候山鳴二日 十三年七月雨白

絲丁卯海水日三潮 十四年大旱種不入土人相

食安溪盜李太南安盜呂光甫為亂七月圍郡城不

克 十七年萬戶賽甫丁阿迷里可反據郡城民被

荼毒 二十六年七月同安大雷雨三秀山崩

明洪武九年大水蕩沒民居無數 三十一年大水壞

民廬舍

正統十年五月大水 十三年鄧茂七據杉關攻上游
郡縣將攻郡城郡守熊尚初提民兵與晉江主簿史
孟常陰陽正術楊士洪拒戰城南古陵坡皆死之

成化十二年大旱饑 二十一年春夏積雨連月晉江
同安惠安三縣田廬禾稼多壞 二十二年春夏連
旱禾苗俱槁秋復旱民多流移九月地震三次 二

十三年春旱無麥秋大旱無禾

弘治四年漳平盜溫文進寇安溪陷縣治副使司馬璽
討平之 六年七月初三日大風雨自卯至申揚沙
走石開元寺西塔葫蘆傾覆折林木無數城鋪粉堞
頽十之九壞官私廬舍商舶民船不可勝計是年大
有秋甲寅麥復大熟 十年安溪縣三公峯崩聲如
雷 十二年冬甘蔗生花結實如黍是年饑 十三
年三月地震有聲 十四年大旱無禾安溪縣午山

崩 十六年七月九月大水漂沒民居

正德五年廣東盜起掠安溪南安晉江諸縣 八年旱

饑民採草木實有餓死者 十一年八月地大震安

溪午山崩 十二年地生毛白黑二色一夜長二三

寸民驚駭兩閱月乃沒 十三年南安縣麥一莖兩

穗同安縣粟一莖五穗 十五年三月二十五日安

溪地大震聲如雷

嘉靖七年八月初九夜同安縣大風拔木飄屋瓦至初

十日晚雨下如注風乃止 十一年冬雨雪次年同
安大熟 十五年十六年旱饑民多流殍 十七年
同安甘露降凝木末如飴人爭採之御史李元陽奏
進薦於太廟 二十一年五月十三日同安晡時海
中氣蒸如霧有斷虹飲海日下赤雲夾擁南飛一書
生曰天殆將颶乎衆問何以知之曰吾讀蘇過颶風
賦斷霓飲海而北指赤雲夾日以南翔與此符耳俄
而大風起屋瓦盡落巨木悉拔 二十三年二十四

年相繼大旱民饑死載路二十三年五月南門橋
十字街火燒民居三百七十餘間二十六年八月
大雨水入民居淹半壁各鄉俱有水災三十二年
縣西郭氏宅產芝一本三十六年冬十月民訛言
有馬騮精者來時如火星墮地婦人犯之輒昏仆以
桃柳枝撻之否則必死戶懸桃柳夜聚婦人露處男
子環守之鳴鑼鼓達旦有司禁不能止有黃冠鬻符
於市捕訊之搜其囊所為火星乃以硫黃和樟腦為

之妖遂寢 三十七年倭自福清海口入寇泉州衛
指揮童乾震引兵迎戰死之倭自長坑頭登岸由龜
湖突至安平市殺掠數日乃去至惠安知縣林咸率
鄉官李愷等拒守城賴以全復分二支一由海道寇
鴨山林咸復率兵拒戰死之一由清源山寇陷南安
遂至郡城城中固守二十日遁去 四十一年郡城
瘟疫人死十之七市肆寺觀屍相枕藉有闔戶無一
存者市門俱閉至無敢出 四十三年五月淫雨不

止大水入郡城鄉村皆没人畜多死 四十四年三月十七日同安疾風迅雷陰雨如注未時忽昏如夜咫尺不辨申時始稍開霽 十二月初六日大雪山村雪積三四尺 四十五年正月朔夜地震牆屋搖動 五月二十一日夜郡城大風雨害稼拔清軍館前大榕樹城堞多壞

隆慶元年正月二十九日酉刻地震二月二十一日未時小震四月初三日酉時又震四月初八日雨至五

月初一日乃止有豹入郡通淮門至教場獲之二
年正月十四日石筍橋梁鳴三日而折 二年春麥
禾大熟

萬厯元年大有年 二年九月暴雨三日水漲郡東西
隅尤甚市可行舟廬舍傾圯瀕溪民畜溺死無數

七年正月不雨大旱蝗民饑饉六月乃雨 九年五
月同安長興從順里蛟起雨傾如注漂流民居人多
溺死 二十二年四月惠安地震有聲如雷從東方

而西 二十四年八月惠安颶風大作九月地大震
二十五年同安積善翔風等里雨雹大如瓜小如
桃碎瓦損麥 二十八年八月同安地大震 三十
一年七月惠安地大震八月同安大颶風海水溢積
善嘉禾等里壞舍溺人無數十月地生毛十一月二
十八日申時有大星如毬自南墮有聲是年漳州人
販呂宋者數萬人皆為所殺 三十二年十一月初
八日地震初九夜大震自東北漸向西南是夜連震

十餘次山石海水皆動地裂數處開元東鎮國塔尖
石墜併碎扶欄城內外廬舍多圯覆舟甚多 三
十三年十二月南街火發延燒百餘家 三十四年
八月初七日颶風大作飄折石坊十餘座開元西鎮
國塔銅頂鐵蓋崩壞是年饑 三十五年正月地震
八月二十八日颶風大作府儀門府學櫺星門東嶽
殿俱壞城樓雉堞窩舖傾圯殆盡洛陽橋梁折 三
十七年五月初六日地震 四十二年夏海水一日

二潮秋大水平地數尺田宅墳墓多崩壞漂棺無數
四十三年夏旱 四十四年大饑 四十五年大
疫 四十六年秋赤雲見東方長丈餘形如刀數月
不散

天啓六年三月南安治前火東西兩畝盡燬

崇禎四年十二月二十一日丑時地震 五年二月初
二日地震 十五年雨水如血

國朝順治三年貝勒統兵入閩九月至泉州 四年雨

絲九月南安寇莊廷張益率衆萬餘圍城焚冲霄塔
雲龍橋燬 文廟割禾為糧同時諸邑皆有嘯聚守
將棄城遁知縣黃琮遇害 五年八月源山蛻巖頂
石崩 十一年十二月同安縣浚減及五蘆山後地
中有烟起三日不散泉湧如血 十二年雨赤色復
雨絲 十三年正月大雨雪平地尺許五月南安署
東榕樹吐烟高數丈越數日西榕樹亦如之 十四
年七月雨絲數日 十五年五月虎入北門水關

十八年秋颶風大作晝暝

康熙元年三月四月大饑是年同安海中人面魚見
人笑之而沒越明年遷地二年春雨雹夏南安大
水市可行船七月又大水是年鄭鳴駿鄭纘祖鄭纘
緒等率衆歸誠四月朔安溪縣黑光摩盪如連環狀
自辰至午乃止三年六月二十六日暴風雨水驟
漲自辰至申水高丈餘城中市肆湮沒淹死甚衆三
晝夜乃退城外墳廬多漂圯十月初旬彗星躔翼宿

長丈餘西北直抵婁宿歷十有三舍積月餘乃消

四年大旱自十月不雨至五年三月五年七月雷

震紫帽山頂凌霄塔崩一角八月郡東門外巨石夜

崩如刀劈是年同安有虎患有司令近村設械捕

之患乃息是年丙午六年丁未同安大有年

先是乙巳

以前大歉老稚流殍忽東山石上露字形曰天太平丙午至此有年

七年府學榕樹

發玉芝三莖八月同安大水壞民居禾苗壓倒

八年秋大旱九年四月晉江民獻兩穗麥秋同安

大旱九月朔風雷暴發大雨雹 十年十月安溪地震有聲 十二年三月十六日午時地震聲如雷

十三年三月十五日耿精忠反十九夜提督王進功焚崇陽樓搜掠郡城二日 十六年二月官兵克復

泉州 十七年五月泉州城鳴聲如微雷 十九年

三月四月大饑斗米二百八十錢 八月初八日大

風拔木空中火光如電雨如注 二十一年二月泉

州東門外民家豕生豚兩頭八足 七月中夜有大

星十餘各曳長尾其色慘澹自西南入於箕尾分野
二十九年三十年大有年 三十四年虎鬪於同
安三秀山巔俱斃 三十六年三月同安蟲生遍野
食五穀 三十七年四月二十八夜同安大雨如注
山崩水漲數丈西門城崩湮沒民居數千家 四十
六年六月十一夜同安大水廬舍傾壞 四十八年
八月一日辰刻昏黑如夜 五十年春正月土寇陳
五顯倡亂於安溪冬十月督撫計擒之送 京師伏

誅 六月地震七月又大震 五十七年八月初二
日淋雨數日山水驟發海漲入城高數尺新橋石梁
衝壞人畜溺死甚多

雍正元年九月十五日郡城南火燬壞民居 五年五
月郡城米價騰貴縣令發倉平糶奉

旨截漕賑濟民賴以甦 六年晉江南安同安秋旱

詔免被災田畝錢糧 七年五月郡城東門外嘉禾
兩穗 八年七月十六日大水漲入郡城 八年九

年大有年

漳州府

梁大同六年九龍晝戲西江

唐開元十三年十一月朔漳浦縣梁山上祥雲見如天
仙佛像麟鳳花草之狀爛亘百里彌月乃散

天寶八載漳浦民鍾文定獲白鹿牝牡各一送郡繪圖
以進

宋咸平二年十月山水泛溢壞民居千餘區

大中祥符七年二月民邱顗於九龍溪獲一魚腹有珠
圍濶三寸七分傍有小珠七狀如七曜太守王冕表
進之

治平四年秋地震

熙寧十年饑

崇寧元年大旱

政和七年二月甘露降於司理院雙梅上光燦射日三
日未晞

紹興四年春威惠廟燕堂中山茶葉吐兩花如龍爪一本五出一本八出色青綠有異香十四年靈芝三莖產郡學戟門東楹十六年瑞蓮異萼並蒂產郡學直舍池中十八年漳浦崇照場海岸有巨魚至高數丈割其肉數百車至剡目乃覺轉鬣傍舟皆覆又漁人得魚長二丈餘重數千斤剖之腹橫人骨膚髮如生

隆興二年自春不雨至於八月

淳熙十年九月乙丑大風雨水暴至州城半沒壞民居
八百九十餘家 十一年四月不雨至於八月是年
無禾

嘉定九年五月大水漂田廬害稼 十六年秋大水害
稼十五六

紹定元年祠山廟戟門桂樹生花一簇十有四莖莖間
五葉狀如紅梅

元至治三年九月大水

泰定三年九月大水

至正十四年大旱

明宣德五年長泰縣林震宅前兩井鳴三日是年震狀
元及第

正統十年十一月癸未地震日夜凡九次鳥獸皆辟易
飛走山崩石墜地裂水湧公私屋宅摧壓者多凡
百餘日乃止長泰南靖皆然 十四年沙寇鄧茂七
倡亂其黨楊福率衆陷漳浦南靖長泰圍漳州指

揮顧斌擊走之

天順五年五月戊午夜風雨大作飛石拔木洪水汎溢
漂人畜甚衆東門內外譙樓皆圯龍溪縣鴻山崩
七年七月疾風暴雨北溪大水淹至平地深五丈柳
營江橋亭漂沒無遺

成化九年四月有大鳥止郡庭榕樹上身色青灰翅黑
嘴足淡紅高丈餘展翼盈二丈攫紫燕白鷺食之知
府張瑄射中其頸飛去復來為弩人射死 十年七

月戊午夜暴雨如注山崩水涌壞軍民廬舍不可勝
計浮尸蔽江 十二年大旱八月中旬龍溪七都下
坂社有物如雲片亂墜形如猴猿相牽援長二三丈
須臾而滅 十八年秋八月甲寅夜火燒雙門樓及
公私廬舍數百區 二十一年春夏積雨連月龍溪
漳浦南靖三處田廬禾稼多為所壞

弘治末年漳浦九都有巨魚入港潮落不能去鄉人爭
剖其肉 龍溪文山大楓樹產異花花如蘭葉如桂

香聞數里凡四十日乃謝

正德四年漳浦蝗入境食禾稼知縣胥文相為文以祭
害亦旋息 八年蘆溪賊反南贛汀漳軍門王守仁
合二省兵討平之

嘉靖七年龍溪平和甘露降松栢上 九年漳浦饑其
春麥熟山竹生實如米採得數百石饑民賴之是年
漳浦四都海嶼三峯並列忽沒於海不見頃之三山
並為一峯屹立騰空有樓臺魏煥之狀變態不常浮

沉不一如是者三日

或云蜃氣所為

十六年龍溪甘露降

郡守作甘露亭

四十三年六月南靖縣北大帽山

鳴三夜後移縣於此山之麓

四十四年南靖永豐

里雨雹大如鵝卵折樹碎瓦人畜俱傷

隆慶二年三月十七日海澄縣黑雲挾龍自八都東方

起捲屋裂瓦火光倏忽燒燼田蔬古塚棺柩有移擊

者至港口而滅

萬曆九年五月二十四日龍起於十一都廬洲渡江至

雲洞而止禾稼損傷而無風雨 十八年四月穀貴
饑民搶掠大戶數十家知府李載陽捕之三日乃定
執倡亂者斃於省獄 二十年長泰大雨雹大者如
卵小者如拳 二十五年春地生毛八月二十八日
溪池自湧水溢數尺 四十二年八月初五日大風
雨飛瓦拔木西南北三溪水漲田廬漂沒無算 四
十五年六月大雨西北二溪水漲城垣不淹者盈版
海澄等縣民居漂沒死者不可勝計先數日有鳥一

足狀如雞舞於海澄之吾養山識者云商羊也

泰昌元年四月東方有氣長竟天

天啓四年郡城內外地生白毛南隅居民豕生豚形如
嬰兒餓死 六年海澄有大星從縣南向西而墮火
光散亂數星隨之

崇禎四年四月海澄降赤雨 五年三月十四日晨有
二啓明並起相映至十七日乃止 八年五月初四
日漳浦南溪競渡民擁觀於城樓迅雷突起震死十

有四人 十七年平和賊梁良等率衆萬餘寇城
國朝順治二年十一月天上有聲如大炮由東而西殷
殷不止 是月鄭芝龍降子成功遁入南灣鄭彩鄭
聯據廈門沿海銅山古雷游灣等處悉為寇穴 四

年正月鄭成功鄭彩寇海澄賊將王來破九都學城
參將田爵禦之焚橋而守知縣吳治臣自漳回賊要
殺之副將王進自郡赴援夜開西門架棧飛渡縋入
學城賊皆熟睡盡殲之既又擊賊於南門射殺其前

鋒將洪致賊阻閘水多溺死成功遁去 五年春詔
安大饑 三月海寇許祚昌圍漳浦遊擊唐欽明禦
之援兵至乃退 十二月總督李率泰入平和戮曾
慶及謀叛者十三人 六年十一月鄭成功陷雲霄
守將張國柱死之進攻漳浦守備王起儔密約為內
應謀洩走降賊賊退屯盤陀總兵王邦俊追破之遂
復雲霄 八年二月提督馬得功破廈門四月鄭成
功還據之 九年正月鄭成功大舉入漳至海澄守

將赫文興開城納之知縣甘體垣不屈沉於海遣將
分徇各縣以上中下為餉額酷拷富戶五月漳州城
被圍城中大小餓死七十餘萬十一年正月鄭成
功遣其黨散各邑沿鄉派餉凡數月漳及興泉皆受
其害十二月鄭成功入漳州十二年二月初二
日巳刻日三暈狀如連環是年春大兵入閩成功
勢不支六月墮漳州及漳浦南靖長泰平和詔安各
縣城十六年鄭成功寇江南兵敗精銳喪盡逃歸

屯據廈門抽沿海居民為寇 十月初一日天有聲
如炮有星如火隕自西南

康熙元年三月南澳偽忠勇侯陳豹降 三年六月大
水壞廬舍千餘家漂溺人畜無算 十三年三月耿
精忠反傳檄至漳巡海道陳啓泰死之 六月鄭經
圍漳州黃芳度起兵禦之使其兄芳泰突圍入粵請
援 十月初六日黃芳度部將吳淑與弟潛叛降於
經黃芳度死之 十五年十月彗星見光芒丈餘經

旬不減 十六年二月大兵至漳鄭經走廈門各縣
以次恢復 秋蝗晚禾無收米價仍平 十七年白
氣二道見北方十餘日乃滅夏大水 二月初十日
劉國軒吳淑犯海澄三月劉國軒列陣於赤嶺提督
黃芳世擊敗之 四月總督姚啓聖調江南提督楊
捷入漳合兵救海澄六月海澄陷提督段應舉都統
穆伯希佛死之 是月賊陷長泰九月總督姚啓聖
遣兵復長泰 十八年七月朔龍起泮池 十九年

五月大旱 大師十餘萬駐漳米價騰貴總督姚啓聖令各郡協餉以本色運至價遂平 是年彗星屢見昏中白氣見東南芒烟射斗 二十年遷民悉令復業先時銅山陸鰲懸鐘浯與瀕海一帶居民遷入內地 十九年三月海平遷民盡復故土結草為廬以田以漁人烟輳集鷄犬之聲相聞 二十二年五月大旱漳屬數百里地盡赤秋始雨冬大熟 是年大師入臺灣鄭克塽降

塊經子

自是漳人無復海患

是年大有年 二十三年正月梁山鳴 是年穀
大熟斗米銀二分 二十四年六月三十夜賊夥林
恩陳媽等十餘人謀襲漳城事洩駐防總兵官金世
榮悉杖殺之 六月大水郡城南橋圯沿海一帶禾
稼多壞 二十五年閏四月十二夜大雷雨郡城震
死者八人 是年田禾大熟斗米直二十文 二十
六年雲霄營兵陳五妻一乳三子俱育 二十七年
梁山蓮華峯巨石崩 二十八年五月海濱蝗漸入

內地至近郊而止不食苗 十月二十九日申時虹
繞興教寺有星吐白氣於東南 三十年春不雨米
價騰湧 三月奸民林姐謀襲漳城事覺姐逃瑄溪
左營遊擊張繼良合瑄溪汛兵捕之擒姐斬於市

三十三年大水郡城南橋民居盡沒 是年秋漳浦
縣西南郊晚稻方插即吐穗結實有一稔二米者八
都尤盛 三十五年三月漳浦西門內居民王佐家
雨皆紅水東門外雨皆黑水水濁味腥 四月初十

日梁山祥雲見旬日始散 三十七年春夏米價騰
貴漳浦知縣陳汝咸請發倉平糶 四十年大旱各
縣禾苗盡枯 四十一年春大旱不見青草五月乃
雨 四十二年七月二十七日慶雲見西方移時乃
散 四十六年六月漳浦大水壞城東角自南門以
至雲霄廬舍漂沒知縣陳汝咸分賑難民修葺城垣
是日雲霄鎮城崩四十九丈 四十八年春南靖有
雙白燕飛繞學宮 四十九年大旱 詔發漕米三

十萬從海運分賑漳泉興化 五十年七月十八夜
地震各縣同九月又震十二月龍溪雨雹 五十六
年四月二十七日大水禾田港岸皆壞 六十年正
月二十九日大雪平地尺餘

雍正七年正月二十七日大雪是歲田禾大熟 八年
九年大有年

延平府

唐大厯二年秋沙縣大水

建中三年六月沙縣旱疫

開成五年沙縣蝗疫

五代長興四年沙縣地震

宋太平興國七年劍溪水漲壞民廬舍

至道三年南平劉相妻一產三男

景德四年山水泛溢漂溺居民無算

乾興元年麥一本五穗

天聖四年六月南平沙縣大水詔賜被災家米二石死

者有司瘞之

皇祐四年九月南平進瑞禾一本雙莖十二穗

元豐元年五月木連理

元祐初順昌進瑞粟一本十二穗 六年順昌瑞粟一

本三十九穗

元符元年南平瑞禾一莖九穗順昌瑞禾一莖十二穗

政和間沙縣葉隆吉家瑞花生狀如牡丹紅榮不謝後

隆吉第進士

宣和二年芝生鄧肅家五年順昌縣交溪廖懋以奉
議大夫致政家居役夫解柿木為薪木中有文曰聖
元天何四字字體端楷黑色瑩然尤溪縣東市榕
樹忽騰異光經三晝夜乃滅近樹居者盧安邦吳士
逸李仕美相繼第進士

紹興十八年秋尤溪縣雨黑雨着衣皆黑

乾道四年順昌縣槎溪祥雲彌布大雨至田間水隨雲
上涌高三十餘丈東流百餘丈有神物隱現

淳熙四年五月南平大水漂民居千餘家 十六年大
火民居存者無幾

慶元六年五月大水漂民居害稼

嘉泰二年七月大水害稼丙午劍浦縣漂沒三百五十
餘家

嘉定元年秋七月沙縣災燔官舍民居一千餘區 十
七年五月大水郡城樓圯民避水樓上皆死

淳祐六年順昌進瑞禾一本三十九穗 十二年六月

大水冒城郭漂室廬死者萬數

寶祐元年將樂饑義士鍾元隆發廩賑之

宋時尤溪縣民陳油妻產二子肢體異胸腹相連踰時死

元至元十六年七月巨賊鄧仕明寇將樂軍民總管吳林清平之尋平蕭良金之亂十八年吳林清平清流賊火星女將軍二十五年吳林清平泰寧賊江海

至正元年順昌進嘉禾一莖五穗 四年夏秋大疫臨
川賊鄧忠寇將樂邵武路總管吳按攤不花却之
六年八月己巳災燔官舍民居八百餘區

明洪武元年汀州賊金子誠陷將樂武臣朱平章復之
永樂十四年夏南平將樂順昌沙縣俱大水

正統十二年沙縣鄧茂七作亂十月寇將樂指揮楊華
千戶徐昇擊却之 十四年正月寧陽侯陳懋等率
師討鄧茂七月茂七寇郡中流矢死

成化五年將樂饑光明陽岸都民強富室發倉二十
一年三月雨至閏四月不止溪水泛溢高十餘丈害
田稼壞公私屋宇民居漂蕩尤甚二十三年八月
甲戌災四鶴西水二城樓燬延民居佛寺千餘區十
一月己未夜廣豐倉火延及預備倉米穀

弘治十一年七月南平吏舍火延燒縣署儒學民居

十二年南平順昌沙縣饑詔有司賑卹十七年順

昌縣庭甘露降二十三年五月將樂大水漂沒三

華橋及隆池都民居

正德四年永安寇敬二倡亂僉事羅某討平之八年
德化寇鄭韓五倡亂知縣曾確購擒之十二年四
月十九日沙縣地震九月郡城災將樂奸民董旭為
亂十六年八月朔未時將樂縣晝晦星見禽鳥投
林

嘉靖元年大田賊鄭新筠引汀漳寇掠境有司捕之尋
平二年三月永安災燒民居千餘家六月又災

七年將樂多虎縣簿洪俊教民弇捕之十年夏
將樂大饑隆安長源等都民張庚光等強劈富民倉
知縣發預備倉賑之十一年彗星見西南方十
四年五月十四日西溪大水逆流東溪浸至八角樓
不沒者三尺二十四年十月十七日夜南平有星
西流大如斗墜地聲聞百里是歲大疫死者萬計

二十七年六月大水三十年十二月災燬官民廬
舍數千間三十四年五月順昌人伐松樹剖之有

花下一壺酒五字將樂虎傷人縣令籍民為鄉兵民
苦之 三十五年夏郡饑秋大疫知府彭澄發倉賑
濟將樂鄉民黃善糾黨三十六人橫行市鎮鄉民張
元計擒之閏七月上杭賊流劫余家坪義兵周長戰
死 三十六年黑青為災

民間訛傳海驢精同
時福泉二府皆然

三

十七年廣賊破貢川 三十九年七月大帽山賊劫
將樂官軍追之敗績十二月十九日程鄉賊陳紹祿
攻將樂知縣俞一中募義兵擊却之所過鄉都殺掠

甚衆 四十年山寇蘇阿普傳紹五等分掠諸縣郡
守周賢宣計勦之 四十一年三月將樂軍人雷皮
為亂 四十五年十一月沙縣大州坊災

隆慶二年八月蛟湖奸民孫賽作亂有司討平之 三
年十二月郡城災

萬厯元年六月二十九日郡儒學對山五色雲見 三
年五月五日大水入城八月大饑 五年將樂彗星
見西方八月二十七日有星吐白氣長數丈至十月

乃沒 七年七月沙縣太白晝見 八年南平縣治
災 十二年九月十一夜將樂有星光芒如斗自東
南流入西北 十三年府治前災延燒至四鶴門
十五年八月十六日新建南平儒學有童子持芝獻
瑞復於故處得紫色金色玉色芝各數本 三十二
年謝屯奸民吳建以白蓮惑衆聚千餘人檄順昌
知縣計擒之

泰昌元年禾一莖三穗是年大有年

天啓二年四月十一日大風雨雹 六年八月二十日
將樂流星如虹光芒亘天 七年五月二十日雷震
南平縣門

崇禎元年南平饑 八年七月初六日災燬四門城樓
及公署神廟十四所民居三千餘家 十二年梅平
州賊起調南營兵勦之 十三年七月將樂雨黑粟
十七年七月將樂大旗山頂有旗五色移時而滅
國朝順治二年二月初六日大風雨雹屋瓦皆飛 四

年二月初六日地震五月大水寧化賊羅廷等焚劫
將樂元坪將樂奸民吳長文謝七寶等引盧溪賊陷
城殺知縣錢榜縣丞方抗長文七寶等為其黨支解
死 七月順昌有飛虎入城隍廟山賊楊日烱攻順
昌縣連月不得入十一月十九夜穴地而入城陷知
縣錢嘉倫典史周世榜不屈死之 六年沙縣大饑
斗米銀五錢 七年將樂多虎患 八年虎入郡城
將樂奸民吳寶娘聚眾為亂 十一年二月順昌丁

祭大成殿燭花祥光如輪 九月副將高守貴賀國相討吳賽娘千總柴自新計擒斬之餘黨悉平

康熙四年四月不雨至於八月 六年九月九日郡城

災延燒千餘家 八年十二月劍溪水躍高數丈有

異聲 十一年南平梅山鳴聲如水沸 十八年八

月天河水鳴是月郡城災 十九年十一月彗星見

西方形如匹練三旬而滅 二十七年三月三日南

平縣署災 三十三年郡城災延燒一千六百餘家

三十五年二月不雨至於五月米價騰涌知縣陳
兆聲開倉平糶設粥賑饑民甚賴之 四十年威武
坊災 四十六年大水入城淹壞民廬 五十年九
月地震 五十二年順昌縣匪類盧天章率衆為匪
官兵捕獲之尋伏誅 五十七年四月府治前災延
及譙樓司獄解舍

建寧府

晉太康八年十二月癸卯建安雷電大雨

唐武德四年妖賊武遇陷建州 五年刺史謝元復建

州

大厯二年大水

貞元十二年大水

嗣聖九年蝗

建中二年建陽孝子劉常廬墓產芝二莖形如鷄冠紫

色扣之作金石聲

景福^缺年孝子熊衮父亡貧不能葬天雨錢三日

宋淳化三年建安軍城西火燔民舍官解殆盡

至道二年七月大水漲溢壞倉庫民舍萬餘區

天聖三年二月朔崇安大風雨武夷五曲石堂陷為潭
四年六月大水詔賜被災家米二石溺死者棺瘞
之

寶元元年自正月雨至四月溪漲入城壞民廬舍溺死
者甚衆詔賜死傷家錢有差

至和五年崇安進嘉禾一本九十莖

治平四年秋地震

熙寧元年八月大雨雪州民楊緯所居之西黃龍見下
有一木如龍而形未全具七月大雷雨復有龍飛其
下及霽有木龍尾爪皆具合舊木宛然一體明年繪
圖以進

政和四年八月郡境竹生米數十萬石

建炎元年軍校張員作亂殺守臣嬰城自守二年轉
運判官謝如意討張員誅之是年六月州卒葉懷

等又作亂陷福州七月入寧德復還建州詔命御營
中軍統制張俊同兩浙提點刑獄趙哲率師討之大
破僂兵於建州城下僂降復叛尋擒誅之 四年御
營前軍將楊勅叛焚建州都統制劉光世招安之
四月奸民范汝為作亂知州事劉子翬移避崇安
十月遣御史臺檢法官謝嚮招撫汝為汝為降詔補
民兵統領

紹興元年正月謝嚮率范汝為討平建陽山寇劉時舉

二月以辛企宗為福建制置使詔企宗及嚮罷遣汝為兵汝為不聽復叛去入建州守臣王俊民棄城走辛企宗退屯福州五年命神武右軍都統制韓世忠討汝為大破之汝為自焚死餘黨悉平

乾道四年六月旱五年七月羣山暴水湧出漂民廬舍溺死者甚衆

淳熙四年五月大雨三日水漂民屋數千家十五年水圯民居

紹熙元年十二月大雪深數尺查源洞寇張海作亂民
入山者多凍死戊申海寇浦城縣焚殺數百家二
年二月大風雨雹仆屋殺人三月癸酉大風雨雹壞
廬舍五千餘家禾麻蔬果皆損五月戊申大水

慶元六年五月大水五日漂廬害稼

嘉泰二年七月大水山崩漂壓民廬

嘉定十一年旱十七年五月大水没平橋入城

淳祐十二年六月大水冒城郭漂室廬死者甚衆

景定元年建陽嘉禾生一本五穗詔改建陽為嘉禾縣
元至元元年饑

至正三年秋浦城民家豕生豚二尾八足 十一年十
一月浦城雨黑子如稗實 十九年四月己丑甌寧
縣星隕於營山前聲如雷化為石

明永樂十四年七月大水

正統五年政和縣民范奴田產嘉禾異畝同穎一莖二
穗三穗四穗者凡十餘本

成化三年六月地震八月松溪雨雹 十六年九月壬

戌有火星自西北流入東北色赤尾長聲如雷 十

九年五月浦城大雨連日山水泛溢高三丈餘橋梁

盡壞山崩地折沙淤民田三十八頃溺死者三十八

人 二十一年夏至大雨山水驟溢建安甌寧建陽

三縣民廬多壞瀕溪人畜俱盡

正德元年正月朔正北天裂有紅光濶二丈長數十丈

二年大饑

嘉靖十三年建陽松溪大水 三十年五月建陽松溪大水 三十一年五月十一日郡城大水 三十九年八月崇安青見民家插桃柳震金鼓以禦之兩月始息 四十年春崇安鼠引羣渡溪夜宿於樹夏大雨雹鳥獸多擊死 八月流賊夜突至郡圍七日不克解去參將戚繼光督兵兼程至盡殲之 四十二年山賊劉大眼乘機竊發村落被害 十二月倭屠政和縣松溪戒嚴旋犯松溪松人伏弩殺其巨魁三

人倭薄城下松人前哨出戰敗之次日攻圍八門相持三晝夜不克乃佯解去倭密造雲車雲梯為攻城具義士陳春金長唐葉暄等傾家財以犒士未幾倭復至力士張德李士清朱蓬毛等力禦之矢石齊發車梯俱碎乃遁四十三年正月十五日倭復犯松

溪松人伏兵四起殺倭無算

時有奪得倭牛角者夜吹之倭自相擾亂攻殺

達旦次日松人出兵擊之又張疑兵為襲營狀倭大潰松人尾之斬滅殆盡

隆慶二年六月崇安大風仆學宮左右廡及城隍廟七

月雨雹如彈

萬厯元年郡城地震 十三年管門巷火巷隘火急蹂
躡死者三百餘人 十五年二月十三日定安坊火
延民房數千間建安甌寧縣治西察院城隍廟清軍
督糧理刑館俱燬八月二十四日建陽火焚朝天橋
救火死者二十三人 十六年六月建陽蝗 十八
年六月政和門火延燒千餘家松溪六月不雨至於
秋九月 二十三年三月大雨雹 二十八年二月

建陽雨雹八月地震 三十一年五月浦城火延燒
四百餘家倉庫解宇俱燼 三十二年十一月初九
日松溪地震 三十七年五月郡城大水舟從雉堞
入公私廬舍一時俱圯溺死男婦無算 三十八年
浦城旋風害稼 四十一年崇安大水

崇禎五年甌寧 聖廟明倫堂燬 十六年大旱 十
七年正月八日寧遠門有哭聲武弁巡城守者以告
政和門城牆皆哭聲如女兒啼 是月正月天忽晝

晦須臾頰紫色大雨雹重十餘斤大中寺金剛首折
府獄中神像生鬚長半寸虎自寧遠門入城

國朝順治四年甌寧梅歧里瑪瑙菴前桐樹枝葉皆化
刀劍形夏建安鐵場山崩壓田二十餘畝五月十六
十七日大雨水漲入城水深三四丈七月妖僧王初
作亂陷郡城又攻旁邑惟浦城堅守得全五年四
月建甌二縣竹生米次年大饑米石銀五兩大兵克
復建寧府王初就擒七年建陽譙樓燬九年松

樹生蟲各樹自死次年寇亂崇建皆然又吉陽里雄
鷄化為雌生卵抱雛次年寇掠村盡墟是年奸僧
陳德作亂由建陽入甌寧所過為墟五月建陽開福
寺井水溢九月十三日山寇圍縣城焚朝天拱辰二
橋關廂盡燬至十六日圍始解十年大疫七縣皆
然崇陽為甚十一年二月大風雨雹郡學井有龍
躍起繞明倫堂冲柵而去是年大水米一石銀五
兩餘十二年大饑奸民張建聚黨為亂十三年

建陽開福寺井水復溢七月千總董世滿等鼓噪劫掠兵道李元萃招撫之十五年近郊多虎樵蘇絕迹崇安縣虎入北門十八年四月雨黑子十餘日焚之有硫黃氣五月雨黑子如稗實二十二日大水各城門崩壞十餘丈通都橋崩人行屋上作筏以渡四山多崩潰約三四百處甌寧奸民蕭為堂嘯聚禾義里協鎮黃繼誼捕殺之六月初一日驟寒霜降苧葉盡白初四日雨雪初六日月見天中

康熙二年三月大風府署川亭吹倒旗竿皆折 是年
崇安大水城壞三處自新嶺下至山均決去石路三
十餘丈田二百餘頃橋七座 五年九月二十五日
地震 十年五月初九日大水通都橋落成石址衝
決 二十五年四月大水甌寧儒學建安公署俱淹
沒倒壞民廬千餘區總督王國安發銀賑給 二十
八年六月初七日夜雷震甌寧 大成殿西楹及殿
上鴟尾 三十二年二月善見塔甫成雷震之工匠

死者四人 三十五年秋旱 四十一年秋旱 四
十三年五月霖雨水漲入郡城牆衝陷數丈時米價
騰貴有司發糶倉穀民情始安

邵武府

宋天聖四年夏六月大水漂沒民廬人多溺死 秋九
月雨水壞民廬

天禧四年三月甘露降

治平四年秋地震地裂泉涌覆壓州郭屋宇軍民死者

甚衆

乾道三年秋八月霖雨禾麻菽粟皆腐 六年大旱

是年泰寧縣有雀飛鳴立斃於瑞寧佛剎香鼎上

絡興

初丹霞佛剎鼎上有雀立斃皆羽孽也釋子妄誕謂之羽化

淳熙十二年饑無麥禾 十六年夏五月大雨

紹興二年夏四月霖雨至於五月 五年秋九月雨至

於十月

慶元六年春大旱井泉竭疫死者甚衆

嘉泰二年夏六月大雨至於七月

開禧元年大水

紹定三年寇亂

詔免被盜州縣租稅一年夏四月丁巳詔下福建諸路總漕倉司被寇州縣合

解諸司錢物比常年期限並展一季

淳祐七年春正月戊寅大水詔運淮浙米二萬賑之秋七月辛丑大水冒城郭漂室廬軍民死者以萬計

德祐元年大疫民死亡幾半

元至正四年夏秋大疫八月旱五年七月大水 六

年秋九月戊午地震翼日地中有聲如鼓夜復如之
十一年冬十一月大雨震雷雨黑黍如蘆稭十
三年秋邵武光澤二縣隕霜殺稼十四年大饑人
相食二十二年春三月大水

明洪武十七年大饑

永樂十四年秋七月邵武光澤大水冒城郭蕩廬舍漂
溺男女萬餘口八月大疫

正統九年饑十一月地震十三年沙寇鄧茂七入泰

寧縣人遁山谷縣治邱墟十四年秋光澤大疫死者以萬計邑人李孟貴蘇彥銘施貧者棺

景泰六年光澤饑邑人沙彥清施貧者粥

天順二年夏四月光澤大水四年夏秋光澤疫

成化二年光澤疫三年光澤饑知縣屈伸發倉賑濟

十年正月地震有聲是年旱禾稼不登十一

年四月泰寧寇亂縣界騷然分巡道童懋畫策擒賊首盧春等五十餘人光澤大疫至冬方息邑人李孟

貴復施貧者棺 是年光澤又大饑縣丞楊鵬發倉賑濟

弘治二年光澤饑知縣魏默發倉賑濟

正德九年大帽山寇從光澤入騷擾邵武郡

嘉靖三十九年山寇竊發由泰寧掠光澤西關外廬舍燒燬殆盡人民死者無算建寧縣知縣吳金團練義勇多方拒守賊無敢犯界

隆慶四年七月大水

萬曆五年十一月彗星見 十年八月朔日食既不辨
東西鷄皆棲宿九月彗星見長竟天其色蒼尾指西
北凡四十九夜乃滅 二十一年六月光澤大水淹
沒城郭知縣陳宗諫以儀門上光澤縣牌擲之水始
退 三十三年邵武縣署生芝草 是年光澤學宮
暨城隍廟災 三十七年五月初八日大水東埧饒
埧登雲橋皆衝壞二十四日又大水平地深三丈北
橋東橋衝壞人民溺死無算光澤泰寧皆然邵武縣

大疫知縣宋良翰賑之 四十四年雷震大樟樹樹
裂中有劉廷之三字

崇禎九年大饑斗米銀三錢無為教奸民倡亂

國朝順治三年江右山寇劫掠鄉村殺傷以萬計婦女
墜崖投河死者連袂相接八月二十六日 大師入

郡人民安堵各縣以次歸順 四年山寇紛起薛三

樂升如等連結外寇攻城副將池鳳鳴知府陳詰知
縣趙之璉協力戰守城賴以全 五年夏四月大疫

六年至九年連歲大饑白晝虎出噬人 十二年
大饑米斗銀三錢 十八年五月霖雨至六月初三
日山多崩裂古山嶺頭移動離其故處山上草木如
故

康熙元年六月二十一日溪水暴漲渾濁如膏臭穢觸
人魚鼈盡死七月初四日月如雀口一開一合移時
乃定 二年三月十三夜月圓如望二十六日日暈
輪外紅綠環繞如虹十一月初七夜雷桃李花 三

年八月初二日午刻 大成殿堦墀下銀杏樹生火
以水沃之愈熾 五年水北虞家婦一產五子四男
一女俱不育 十年五月大水 十四年耿精忠檄
偽知縣陳宗禹派取銅斤鹽口酷刑追比民無聊生
十五年十一月海寇吳淑由汀州襲邵武 大兵
至遁去 十六年夏大疫 十七十八年耿逆餘孽
陳江楊等盤踞西北二鄉焚燬劫掠百里無煙 二
十年大旱 二十一年七月十七日午後大雷電以

風擊破仁壽寺佛殿西門內外晴霽如故 二十二
年大水

汀州府

宋治平四年進桐木有文曰天下太平

元祐五年嘉禾生三十六穗

紹興十七年州羊無角 是年盜妨農郡縣賑粟貸種
二十二年六月蓮生同蒂異莖者十有二

淳熙十一年四月不雨至於八月 是年無禾詔賑卹

十四年三月辛未大水漂民居百餘家軍壘六十餘區十六年大水漂民居千五百餘家溺死三千餘人

紹熙二年三月寧化大水漂田廬

嘉泰二年七月水害苗稼丙午上杭縣水漂田廬民多溺死

淳祐十一年八月甲辰山水暴至漂人民元至元十七年汀寇廖得勝等作亂伏誅

後至元五年六月長汀山蛟起大雨驟至平地水深三丈餘漂民廬八百餘家民田二百餘頃溺死者八千

餘人

戶賑鈔半錠死者一錠

至正四年夏秋大疫十四年大饑人相食

明洪武元年湯和平福建汀州路總管陳國珍以城降
正統十四年沙寇鄧茂七作亂圍汀州四旬弗克

成化二十一年夏大雨山水驟溢長汀七縣漂沒民居
無算二十三年七月戊午夜疾風迅雷震預備倉

火繼發燭米七百餘石

正德十二年巖前寇劉隆等作亂都御史王守仁平之
嘉靖三年十月甘露降 六年三月甘露再降 十八
年五月十三夜星隕如雨 三十九年竹花實如米
居民取食之

隆慶元年至六年大有年禾麻被野米石銀三錢

萬厯七年量田 是年大旱 九年立夏日連城縣三
晨霜降 二十年連城饑姑田里竹生米數萬斛民

賴以生 三十九年虎入黉宮 四十一年冬府署
產靈芝九本

崇禎元年正月廣寇攻上杭三月攻武平十月攻象洞
巡道曾櫻知縣吳南灝誘殲之 三年十月武平磔
坑高家鍋地出血明年流寇大作將士死殆盡督撫
熊文燦會勦直搗其穴 九年大雨雹牛羊擊死四
月大饑 十年正月流寇由南靖入永定署道潘融
春知府唐世涵知縣徐承烈戮力勦賊四月乃撤兵

國朝順治三年 大兵至郡人民安堵 四年四月大
水平地深丈餘舟從城上入 十二月寇陷連城
五年正月 大兵復連城執李士藻等磔之 十四
年五月大水舟繫於樹杪

康熙三年七月彗星見 七年至九年歲大稔石米三
錢 十三年三月耿精忠反二十九日偽檄至郡叛
將劉應麟據城以應 十四年叛將劉應麟索民助
餉 十五年五月二十日叛將劉應麟結海寇陷汀

州城十二月二十三日 大師至應麟自焚其居而遁
十六年 詔蠲免本年丁糧 十八年歸化縣城隍廟災
十九年十一月彗星見 二十五年蠲免二十六二十七二年地丁錢糧之半
四十五年五月大水郡城內深丈餘郡守方伸以汀州府扁投之水乃退
四十七年府署池蓮花上生花

福寧府

宋大中祥符五年寧德支提山石上產芝十五本

建炎二年六月建州叛卒葉懷陷福州七月朔寇寧德縣焚縣治長溪令潘中赴援死之

紹興十六年大雨連旬福寧東平二溪水漲全縣淹沒龜湖山僅露山頂容數百人忽大蛇突出人皆驚溺浮尸聚棲雲寺寺僧立浮骸塚瘞之

乾道元年四月不雨至於六月章灣阮元齡撰懇旱魃文齋禱龍湫甘霖三日五年州治大火

洪清臣之屋獨存

淳熙十年八月雨至於九月乙丑大風雨山水暴至長

溪寧德瀕海廬舍皆漂入海

紹定四年福安縣大有年

先是臨溪沿中紅蓮變為白人以為兆

元至正四年孝子林大興池中紅蓮悉變為白 十二

年七月始團義兵社 十一月紅巾賊寇州城來賓

縣巡檢州人阮宗澤禦賊於南屏死之 州尹王伯

顏禦賊雷壇不屈死之 十五年州縣大饑人相食

十七年正月諸鄉各起團社吞併土田民怨有謠

二十一年十月太安社築城凡橋道墳墓盡毀掘

莫敢誰何民怨有謠 二十四年開王埕田令人四方射矢所及悉為社田民怨有謠

明洪武二年溫州叛賊葉丁香寇州屠戮甚慘官軍討平之大疫死者相枕藉虎縱橫村落間傷人畜無紀有杜門者虎踰垣壞壁而入嚙之道絕行人是年境內稱三災 十九年大水人民淹歿大半田園丘墟

正統五年六月初一日府學泮池瑞蓮生 十四年七

月鄧茂七黨劫寧德縣庫取冊籍穆洋民兵謝統四
討平之

天順五年七月十四日福安東平二溪水溢風雨暴至
漂沒無算十三年三月虎入寧德城十九年六
月海嘯

成化二十一年夏霖雨連旬洪水汎溢州境及福安田
稼多為所傷二十二年春夏大旱寧德縣疫六月
地震九月又震

弘治元年福安三十都田禾一莖三穗多至五六穗
正德十六年壽寧地震屋瓦劃然有聲

嘉靖七年壽寧龍見尋雨雹人畜俱傷 十四年五月

饑十月大疫道饑相望 三十九年倭入壽寧是

年五月寧德泮池水赤午紅晚黑五十餘日皆然

四十一年八月浙江參將戚繼光帥募士八千至府

抵章灣殲倭衆千餘於橫嶼十一月倭陷壽寧四

十二年十二月倭屠壽寧後倭為松溪人所滅

萬厯元年七月二十日午刻曲井水沸溢街上至暮乃止 九年七月初九夜大水漂福安縣巨浪高於敵臺枕尸狼籍僅存東北二隅 十年三月二十日寧德縣穀飛瑟瑟有聲 三十年閏二月大金筆架山突出一峯自己至未變幻不一觀者圖之 三十二年十一月初九日壽寧地震 三十七年八月壽寧大水山崩壓死男婦數百人

崇禎八年壽寧竹生米形如小麥 九年遍山竹皆生

米時大旱米貴闔邑競採食之開倉發糶民賴以濟
十三年七月福安大水漂溺廬舍人畜無算

國朝順治十年壽寧大疫

康熙四年夏府南郊火延燒民舍甚多 五年正月初

三日福安縣大雪積五六尺 六年八月十六日郡

大水 十四年八月福安縣大水舟入城 十七年

九月福安縣陳希卿妻一產四男牙齒俱全踰時死

臺灣府

國朝順治十八年辛丑夏五月鹿耳門水忽漲丈餘先時鹿耳門水淺僅容小艇出入是月水忽漲鄭成功因之大小戰艦進港遂據臺灣

康熙十九年六月有星孛於西南形如劍長數十丈經月乃隱是冬大稔二十年疫先是有神曰天行使者來居安平鎮陳永華宅永華與相酬接自是陳之主臣眷屬凋喪殆盡二十一年七月地生毛九月雨髮如絲二十二年五月澎湖港有物狀如鱷

魚長四五尺沿沙而上鳴聲嗚嗚居民競燒楮錢送之下海是夕復登岸死焉是月大水土田冲陷

夏六月靖海將軍侯施琅帥師攻澎湖拔之二十

六夜有大星隕於海聲如雷二十七日明朱術桂在

臺灣聞大師取澎湖遂具冠服投繯妻妾從死者

五人秋八月鹿耳門水漲大師乘流入臺鄭克

塽歸誠老幼歡迎臺灣平十一月雨雪冰堅寸餘

臺上

氣熱從無霜雪八月甫入版圖地氣即自北而南運屬一統故也

二十五年四月

二十日辰刻地大震 二十九年冬大有年

自蕩平
後年穀

時熟幾不勝書
是歲尤為大稔

三十年八月大風民居傾壞船隻

飄碎 三十二年冬大有年 四十四年冬饑 詔

蠲臺灣府屬三縣四十四年糧米 四十六年冬饑

詔蠲糧米十分之三 四十八年夏鹿耳門有大

魚二狀似馬脊上有鬚長三四寸其尾如獅肚下四

鬚如四脚居民獲其一或曰即海馬也 四十九年

冬饑 五十年九月十一日戌時地震 五十一年

詔蠲本年應徵粟石 五十三年大井頭行舖火
延燒數百間 秋大旱 詔蠲臺灣鳳山粟米十分
之三 五十四年九月大風地震 五十六年冬饑
詔蠲本年錢糧十分之三 五十九年十月初一
日地大震十二月初八日又震十餘日房屋傾倒壓
死居民 六十年五月臺匪朱一貴倡亂陷府治總
兵歐陽凱副將許雲戰歿總督覺羅滿保馳至廈門
檄水師提督施世驃進兵南澳總兵藍廷珍統徧師

援之七日復臺灣械朱一貴至 京師磔之八月十
三日大風天盡赤提督施世驃駐兵郡城營盤飄倒
民居傾壞港內船隻擊碎甚多兵民多壓死十二月
詔蠲臺灣本年粟米

雍正三年七月大風 六年東安坊民魏連妻陳氏一
產四男 七月二十六日大風閏七月二十三日又
大風損壞臺澎商哨船隻有兵民溺死者 八年七月
初十日地震 九年十二月彰化大甲西社白番林

武力學生等聚衆為亂負固拒敵總督郝玉麟調遣
官軍掩捕擒林武力學生等尋正法 十年三月鳳
山吳福生等豎旗倡亂焚崗山營盤及舊社汛房守
備張玉被害總兵王郡率官軍尅日剿滅擒吳福生
等誅之

永春州

宋嘉定十六年德化東西團蔣氏所居門外有巨木十
四五圍葉有稜刺莫知其名百鳥不敢棲又惠民里

下碧村農夫耕於野婦饑之飯有沙怒欲毆婦一道人勸止之頓足而地震曰沙去矣今環村五里許無沙

元至正二年九月大風雨永春南象山崩壓死者多明洪武二十年德化里虎為災羣虎四出白晝噬人於牖下民死亡轉徙相續戶口耗田野荒

成化十八年七月永春大雨至於八月洪水汎濫瀕溪民居渰死甚衆二十一年春夏積雨連月永春德

化田廬禾稼多壞

正德五年廣東盜起掠永春

嘉靖元年大田賊鄭新筠引汀漳寇掠境有司捕之尋
平 三年冬廣東汀漳盜復寇永春知縣柴鑣敗之
於高坪小姑等處義士蔡玉智張元宗等死之 五
年永春五月不雨七月十七日有物如瓜從天如下
流轉於地聲如雷須臾火發聲震衆皆昏仆有震死
者既而雨下如注 十六年六月建大田縣治五色

雲見 四十年叛民呂尚四聚黨攻陷永春擄知縣
林萬春燔典史解殺掠居民而去 四十一年德化
田鼠害稼一畝之田至有數千春食秧冬食穀畦畔
皆鼠道草為不生次年穀貴人多饑死 四十三年
五月十九夜德化暴雨縣前水深丈餘衝激之聲若
雷民居漂流過半東城崩壞 四十五年正月十六
日德化大雨雹七月初十日德化縣晝晦大風雨水
雹如彈四山盡白平地冰積盈尺秋冬大旱無禾

隆慶元年永春四五都岐山崩正月二十九日酉刻地震

萬曆二十九年七月永春霖雨數日山水漲發

國朝順治四年七月山賊林良攻破大田縣知縣胡天湛不屈死之 是年尤溪賊王繼忠襲破德化縣城十五年賊首李高出沒尤溪大田永春間德化富民許于敬陰與交通遂劫東厝寨明年正月縣令何之旭率鄉兵攻之奔入德化總兵林忠遣人招撫乃

降尋伏法

康熙十五年四月十六日德化大雨溪漲入城樓垣漂
没人畜溺死無數 二十年至二十一年德化附郭

虎白晝四出不匝月吞噬百餘人

一虎似馬頂上赤鬣兩垂後脚獨小

伏銳
殺之

龍巖州

明永樂三年夏龍巖疫 五年夏龍巖旱

正統十年十一月地震日夜九次山崩石墜地裂水湧

屋宇摧壓者多 十四年沙寇鄧茂七倡亂其黨楊
福率衆陷漳浦南靖長泰及龍巖圍漳州指揮顧斌
擊走之

嘉靖七年龍巖甘露降松栢上 四十四年龍巖旱十
月大雪平地尺餘

萬厯元年龍巖地震程溪民歐氏生兒有六手隨死
八年七月龍巖大風捲人自西山騰至紫金山麓而
墜

崇禎九年十月賊首和尚仔刼掠漳平縣知縣高光映
督鄉兵追破之 是年太白經天 十年七月山寇
張維新聚衆流刼龍巖大池等處知縣鄧藩錫計
擒之

國朝順治三年月勅統 大師入閩畧定傍郡九月十
六日由大田抵漳平次日漳郡守縣令以次歸附漳
地悉平 四年正月廣賊襲龍巖寒夜迷道城中
覺之賊知有備遂遁 五年六月賊乘夜襲破漳平

知縣戴真學死之

康熙三十七年十一月龍巖甘露降 四十九年十一月漳平盜陳五顯聚衆二千餘人掠漳平永春德化大田等處官兵捕之勢窮就撫械送 京師伏法
雍正四年夏米價騰貴龍巖令張宣發倉平糶

福建通志卷六十五